



e-mail: xxi_asr@umail.uz



ASR

IJTIMOIIY- SIYOSIIY GAZETA

8-OKTYABR
2020-YIL
38 (880)

web sayt: www.21asr.uz

@XXIasrofficial

ЭЪТИРОФ

Ўзбекистон Президенти IX–XII ва XV–XVI асрларда бизнинг ҳудудимизда рўй берган икки Уйғониш даври билан боғлиқ тарихий ютуқлар ҳақида тўхталиб, Ренессанснинг янги босқичини амалга ошириш, Ўзбекистонни дунёдаги етакчи давлатлар қаторига олиб чиқиш, миллатимизнинг маънавий ва интеллектуал салоҳиятини тубдан ривожлантириш учун бой тарихимизни ижодий жиҳатдан қайта англаш заруриятига эътиборимизни қаратди.



Нурдинжон ИСМОИЛОВ,
Олий Мажлис Қонунчилик палатаси Спикери

ҲУҚУҚ



Акмал БУРҲОНОВ,
Коррупцияга қарши курашиш агентлиги директори

Коррупция илллати бу дунёда энг илдиз отган глобал муаммолардан бири

ҳисобланади. БМТ маълумотларига кўра, коррупция жаҳон иқтисодиётига йилга 2,6 триллион АҚШ доллари зарар келтирмоқда. Ҳатто энг ривожланган давлатларда ҳам коррупцияга тўлиқ барҳам берилмаган. Афсуски, Ўзбекистонда бу масалада вазият жуда жиддий. “Transparency international” халқаро ташкилотининг Коррупцияни қабул қилиш индексида Ўзбекистон 180 давлат ичида 153-ўринни эгаллагани ортиқча изоҳни талаб этмайди.

Бугунгача Оврупо халқи осмонга учар экан, бизда соч ва соқол низолари, овруполилар денгиз остида сузар экан, бизда узун ва қисқа кийим жанжаллари, Оврупо шаҳарлари бутун электрик билан иситилур ва ёритилур экан, бизда мактабларда жўғрофия ва табиёт ўқитиш, ўқитмаслик ихтилофлари...

9 ▶



Расул КУШЕРБАЕВ: Мен бирор нарсада айбланиб, судланмаяпман!

Тўғриси, қийин бўлди: тадбиркор бошига тушган иш менинг фаолиятим билан боғлиқ, деган гап чиққани унинг оиласи ва қишлоқдошларим олдида бошимни эгиб қўйганди.

7 ▶



Тошкент вилояти ҳокими Рустам ХОЛМАТОВ диққатига!

103 КУН ЎТДИ

ЛЕКИН ЎРТА ЧИРЧИК ТУМАН ҲОКИМЛИГИ “XXI ASR” ГАЗЕТАСИДА БОСИЛГАН ТАНҚИДИЙ МАҚОЛА ХУСУСИДА НЕГА МИҚ ЭТМАГАНЛИГИ САБАБИ НОМАЪЛУМЛИГИЧА ҚОЛМОҚДА

5 ▶



21 октябрь – Ўзбек тилига давлат тили мақоми берилган кун



Тоғай МУРОД,
Ўзбекистон халқ ёзувчиси

**Жаҳонга қандай қилиб юз тутиш мумкин?
Жаҳонга қандай қилиб кириб бориш мумкин бўлади? Ана шу йўллардан биттаси – тил. Тил – мисоли бир кўприк. Биз жаҳон билан ана шу тил – кўприк орқали боғланишимиз керак.**

О'zLiDeP фракциясида


ПАРТИЯМИЗ

мақсадларига ҳамоҳанг таклифлар

Ҳозирги мураккаб даврда мамлакатимиз таълим тизими ҳам жиддий синовга дуч келди. Шунга қарамасдан, давлатимиз томонидан ўз вақтида кўрилган чора-тадбирлар туфайли бу борадаги ишлар изчил давом эттирилмоқда.

Қисқа муддат ичида юртимизда онлайн мактаб лойиҳаси ва масофавий таълим жорий этилди. Республикаимизнинг аксарият мактабларида, карантин қоидаларига амал қилган ҳолда янги ўқув йили бошланди. Айни вақтда ўқувчи ва педагогларнинг саломатлигини асраш масаласига алоҳида эътибор қаратилаётди.

Олий Мажлис Қонунчилик палатасидаги О'zLiDeP фракциясининг навбатдаги йиғилишида бу ҳақда алоҳида таъкидланди.

Давлатимиз раҳбарининг 1 октябрь – Ўқитувчи ва мураббийлар кунига бағишлаб ўтказилган тантанали маросимдаги нутқидан илгари сурилган ташаббуслар атрофлича муҳокама қилиниб, бу борада парламент қуёи палатасидаги партия фракцияси олдида турган устувор вазифалар белгилаб олинди.

Таъкидланганидек, кейинги тўрт йилда таълим-тарбия соҳасидаги ислохотлар давлат сиёсатининг энг муҳим йўналиши даражасига кўтарилди, кўплаб фармон, қарор ва дастурлар қабул қилинди. Президентимиз яқиндагина имзолаган “Таълим тўғрисида”ги қонун ушбу соҳа тараққиётида янги уфқларни очиб беради.

Халқ вакиллариининг айтишича, мазкур қонунга мувофиқ, таълим олишнинг масофавий, инклюзив шакллари жорий қилинди, таълим ташкилотларига хорижий муассасалар билан қўшма факультет ва ўқув марказлари ташкил қилишга рухсат этилган. Шунингдек, ўқитувчиларга муаллифлик дастури ва ўқитиш услубларини жорий этиш, замонавий педагогик шакллар, ўқитиш ва тарбия усулларини эркин танлаш ҳуқуқи берилган.

Нутқда парламент аъзоларидан мактаблар билан ишлаш тизимини алоҳида назоратга олиб, ушбу жараёнларга яқиндан кўмак бериш сўралди. Шунингдек, Олий Мажлис палаталарига икки ой муддатда умумтаълим мактаблари билан ишлашни янада кучайтириш бўйича тегишли чора-тадбирларни ишлаб чиқиш бўйича зарур вазифалар белгилаб берилдики, бу фракция аъзолари зиммасига катта масъулият юклайди.

Таклифлар

Ушбу муружаатда мактабларда информатика, кимё, хорижий тиллар каби фанлар бўйича ўқитувчилар етишмовчилигини бар-тараф этиш мақсадида педагогик бўлмаган йўналишлар бўйича олий таълим олаётган ёшлар учун қисқа муддатли педагогик курслар ташкил қилиниши ҳам айтиб ўтилди. Айни масалалар сиёсий куч сайловолди дастурида илгари сурилган вазифаларга тўлиқ ҳамоҳангдир.

Кун тартибдаги навбатдаги масала – “Ўзбекистон Республикасида чет эл фуқаролари ва фуқаролиги бўлмаган шахсларнинг ҳуқуқий мақоми тўғрисида”ги қонун лойиҳасининг муҳокамаси ҳам қизгин кечди.

Таклиф этилаётган ушбу ҳужжатда 1966 йил 16 декабрда қабул қилинган Фуқаролик ва сиёсий ҳуқуқлар тўғрисидаги халқаро пакт, БМТнинг 1951 йил 28 июлда қабул қилинган Қочқинлар мақоми тўғрисидаги конвенцияси, 1961 йил 14 апрелдаги Дипломатик алоқалар тўғрисидаги Вена конвенциясининг қоидалари ҳисобга олинган.

Қонуннинг қабул қилиниши чет эл фуқаролари, юқори малакали ва малакали мутахассислар тушунчаси ҳамда ҳуқуқий мақомини белгилашга, чет эл фуқаролари учун давлат хизматларидан кенг фойдаланиш имкониятини беришга, шунингдек, Ўзбекистон Республикаси ҳудудида чет эл фуқароларининг ҳуқуқлари ва қонуний манфаатларини ҳимоя қилишнинг самарали механизмини яратишга кўмаклашади.

Халқ ноиблари юқоридаги жиҳатларни инobatга олиб, қонун лойиҳасини концептуал жиҳатдан маъқуллашди.

Йиғилишда “Мулкдор ҳуқуқлари ва қонуний манфаатлари кафолатлари янада кучайтирилиши муносабати билан Ўзбекистон Республикасининг айрим қонун ҳужжатларига ўзгартиш ва қўшимчалар киритиш тўғрисида”, “Ўзбекистон Республикаси Маъмурий жавобгарлик тўғрисидаги кодексга ўзгартиш ва қўшимчалар киритиш ҳақида”ги қонун лойиҳалари ҳам муҳокама қилинди.

Фракция ваколатига кирувчи бошқа масалалар ҳам муҳокама қилиниб, тегишли қарор қабул қилинди.

Нурхон ЭЛМИРЗАЕВА,
“XXI asr” мухбири

Президентимиз Шавкат Мирзиёевнинг Ватанимиз мустақиллигининг йигирма тўққиз йиллигига бағишланган тантанали маросимдаги нутқидан янграган Ўзбекистонда янги бир уйғониш – Учинчи Ренессанс даврига пойдевор қўйилаётгани ҳақидаги фикри кенг жамоатчилик ўртасида катта қизиқиш уйғотганига гувоҳ бўляпмиз.

Учинчи Ренессанс ғояси атрофида кенг муҳокамалар бошланганининг ўзи муҳим воқеа эканини тан олиш керак. Биринчидан, илгари сурилган ғоя жамиятда катта қизиқишга сабаб бўлгани орқали фаол фикр алмашиш, ижтимоий тафаккурда ўзига хос қалқиб юзага келишига туртки берди. Иккинчидан, жамият аъзоларининг кўнгилдаги, шуридаги интилишларни, ўз даврида аждодлар амалга оширган ишларни янгича кўринишда давом эттириш орзу-истакларини кўзгатиб юбориб, юрт эртасига дахлдор тарихий ташаббусни қўллаб-қувватлаш билан чекланиб қолмасдан, ушбу фикр юзасидан ўз қарашларини ифода этиш, жараёнга муносиб ҳиссасини қўшишга кучли рағбат пайдо қилди. Тарихдан маълумки, юрт етакчиси ўртага ташлаган ғоя кенг жамоатчиликда акс-садо бериб, фаол қўллаб-қувватланувчи мафкура сифатида шаклланса, у, албатта, жамиятни етакловчи реал кучга айланади.

Мавзуга доир билдирилаётган муносабат, таҳлилларда унинг турли жиҳатларини очиб беришга ҳаракатлар кўзга ташланмоқда. Айрим тадқиқотчилар Уйғониш даврларини буюк алломаларнинг номлари билан боғлиқ равишда кўраётди. Баъзилар ўша даврда фан ва адабиёт тараққий этган деса, бошқа бировлар маданият ва санъат соҳасидаги мислсиз ютуқларни тилга олмоқда. Буларнинг барчаси бежиз эмас. Лекин миллатимиз тарихида алоҳида эътироф этишга арзирли воқеалар тўғрисида гап борганда, аксарият ҳолларда юқорида тилга олинган жиҳатлар билан чекланиб қолинаётгани ҳам бор гап.

Ўзбекистон Президенти ҳозирги даврни Учинчи Ренессансга қиёслаб, бундай фикрни ўртага ташлаши орқали ўтмишимизнинг энг юксак паллалари билан фақат фахрланиб қолмасдан, бир қарашда кўздан йироқ, аслида халқимизнинг улкан тараққиёт босқичига чиқиши учун пойдевор вазифасини ўтаган муҳим асосларни чуқурроқ таҳлил этишга даъват ҳам этмоқда, десак муболаға бўлмайди.

Агар мавзуга шундай таҳлил даъво қилсак, қатор ҳаётий саволлар туғилиши табиий. Хўш, бу қандай эҳтиёжки, фаннинг оламшумул даражада ривожланишига, адабиёт-санъат ёки меъморчиликда янгидан-янги йўналишларнинг пайдо бўлишига туртки берган, ҳатто бошқа соҳаларда ҳам туб бурилишларга замин яратган?

Мухтасар айтганда, тарихимиздаги биринчи ва иккинчи Уйғониш даврларидаги кўплаб ютуқларга асос бўлган асосий омиллардан бири ўлкада кеч-

ган иқтисодий юксалишдир.

Таниқли сиёсатчи Содиқ Сафоев ўз мақолаларидан бирида IX–X асрларда Самарқандда зарб этилган дирҳам тангаси бутун Европа ва Яқин Шарқ мамлакатларидаги муомалада бўлган пул маблағларининг учдан бирини ташкил этгани тўғрисидаги қизиқарли фактни келтиради. Ушбу биргина далил аслида ўша замонда ўлкаимизда кечган иқтисодий жараёнларнинг ҳосиласини кўрсатади. Биринчи Уйғониш даврида кўплаб шаҳарларимиз ўзига хос савдо ва ҳунармандчилик марказларига айланиб, ишлаб чиқариш турлари доирасида юз берган чуқур меҳнат тақсими, савдо соҳасида эса бир

ЯНГИ

томондан ички бозорларда ихтисослашувнинг кучайиши, иккинчи тарафдан, чегарадош ҳудудлар ва чет эл бозорларини ўзлаштириш йўналишида амалга оширилган ниҳоятда интенсив ҳаракатлар, албатта, ўз натижаларини бермасдан қолмади. Қишлоқ хўжалигини юритиш, ерга эгаллик қилиш муносабатларидаги ўзгаришлар ҳам ишлаб чиқариш самардорлигининг ошишига туртки бўлди. Айнан ривожланиб бораётган иқтисодиёт: қишлоқ хўжалиги, ҳунармандчилик, қолаверса, савдо муносабатларининг эҳтиёжлари кўплаб фан соҳаларининг – астрономия, физика, кимё, математиканинг ва бошқаларнинг жадал тараққий этишига туртки берди. Бу адабий жараён, маданий муҳит, меъморчиликда ҳам ўз аксини топди.

Амир Темур ва темурийлар даврида эса мўғул истило-сидан кейин ўлка иқтисодий ҳаётини қайта тиклаш ва унинг тараққиётига рағбат бериш борасида мутлақо ўзгача ҳаракатлар амалга оширилди.

Ҳар иккала Уйғониш даврида кечган ҳаёт таҳлил қилинар экан, иқтисодий соҳага салтанат пешволари жуда катта эътибор қаратганига гувоҳ бўламиз. Улар мамлакатда қишлоқ хўжалиги, ҳунармандчилик ва савдони ривожлантириш масалаларини доимий эътиборда ушлаб тургани ва ушбу соҳаларнинг ривожини ҳар томонлама қўллаб-қувватлаганига кўплаб мисоллар топиш мумкин. Масалан, Амир Темур даврида бир қатор солиқларнинг асоссиз деб топилиб бекор қилингани, темурийлар салтанатига бўйсунган барча сарҳадларда ортиқча солиқлар солиш қаттиқ жазога тортиш учун асос бўлгани, тўловларни ундириш қатъий

**Бахтиёр ЯКУБОВ,**

О'zLiDeP Сиёсий Кенгаши Ижроия қўмитаси раиси ўринбосари, тарих фанлари номзоди

қилмайдиган далилларнинг ўзиёқ теурийлар номи билан боғланувчи иккинчи Уйғониш даврида иқтисодий юксалиш қай даражага кўтарилганини кўрсатади. Мана сизга, Уйғониш даврининг ҳақиқий асоси, жамиятни тараққиёт сари етаклаган, иқтисодий эҳтиёжлардан келиб чиқиб, илм-фан, умуман, бошқа соҳаларнинг ривожланишига туртки берган драйвер. Қисқаси, иқтисодиёт, тадбиркорлик, ишлаб чиқариш ва савдо тараққиёти ўлка ривожда муҳим сифат ўзгаришларининг юз беришига сабаб бўлган. Хулоса шуки, айнан фан ютуқларини кенг жорий қилиб борган тадбиркорлик, шу асосда ривожланган иқтисодиёт, умуман, жамият тараққиёти учун, унинг бошқа соҳалари тараққиёти учун муҳим аҳамият касб этган.

Мамлакатимиз тараққиётининг “Янги Ўзбекистон” деб номланувчи ўзгача сифат босқичида аҳолининг иқтисодий ташаббусларига кенг имконият яратиш, иқтисодий

бир бор тадбиркорлик ва фан ўртасидаги ҳамкорликнинг мутлақо янги бир босқичга кўтарилишини талаб қилаётир. Ўзбекистонда Инновацион ривожланиш вазирлигининг ташкил этилгани, ахборот технологияларига берилаётган эътибор, кўплаб инновацион марказлар, стартап марказлари ва бошқалар мамлакат тараққиётини белгилашда айнан шундай фундаментал даражадаги янги ёндашувларга асосланилаётганидан далолат беради.

Тарихимизда ўтган Ренессанс даврларига мурожаат нафақат ривожланиш локомотивларини аниқлашга, балки эндиликда глобал мақсадларни олдига қўяётган халқимиз нималардан огоҳ бўлиши кераклиги тўғрисида ҳам муайян хулосалар қилиш имконини беради.

Олимлар XV–XVI асрларда минтақа ҳаётида капиталистик муносабатларнинг шаклланиши учун зарур бўлган объект шарт-шароитлар этилиб келгани, лекин бу жараёнлар ўзининг кейинги ривожини топмаганини таъкидлашади.

Энди бир тасаввур қилайлик. Биз тарихдан капитализм босқичига ёки цивилизация назария вакиллари тили билан айтганда, “Биринчи саноат

билан бораётган бир паллада сиёсий бошқарув тизимининг эскича услублардан воз кеча олмай қолиши жамият тараққиёти учун муайян муаммоларни бошлаб келади. Албатта, бу ҳали илмий жиҳатдан атрофлича ўрганишни талаб қиладиган қараш. Лекин чуқур иқтисодий жараёнлар кечаётган XV аср охири – XVI аср бошлари ўлка бошқаруви назар солсак, бу борада бирор сезиларли силжишлар, иқтисодиётда кечаётган ўзгаришларни ҳисобга олган ҳолда юз берган қандайдир янгиликларни кўрмаймиз. Айнан мана шу ҳолат, яъни бир томондан иқтисодий соҳадаги катта ўзгаришлар ортидан кириб келаётган янги дунёқараш ва иккинчи томондан сиёсий бошқарувда сақланиб қолаётган эскича ёндашувлар, эскича дунёқараш ўртасидаги зиддият охир-оқибат тарихимизнинг ушбу палласида бошланган тараққиётнинг янги сифат даражасига ўсиб ўтишига тўқнаш қилди.

Бугунги ислохотларнинг ўзига хос йўл харитаси бўлмиш Ҳаракатлар стратегиясида иқтисодиётдаги юксалишларга катта аҳамият қаратилади экан, фақат шу билан чекланиб қолинмасдан, ижтимоий ҳаётнинг бошқа жабҳаларига

УЙҒОНИШ ДАВРИ:

тадбиркорликнинг етакчилик миссияси

назоратга олингани, пул муносабатлари доимий равишда такомиллаштириб борилгани тўғрисида манбаларда кўплаб маълумотлар мавжуд.

Соҳибқироннинг кўпгина Европа давлатлари қиролларига хат йўллаб, ўзаро савдони ривожлантиришга чорлови ва савдогарларни юрт эгалари ўз ҳимоясига олиши зарурлиги тўғрисидаги таклифи тижорат аҳли ва умуман иқтисодиётга эътибор давлат сиёсатида устувор вазифа бўлганини яққол исботлайди. Айниқса, Мирзо Улуғбекнинг ҳукмронлик йиллари бу борада ташланган қадамлар унинг нафақат буюк олим ва давлат раҳбари, балки иқтисодий ислохотларнинг ташаббускори сифатида гавдалантиради. Албатта, иқтисодий соҳага берилган бундай эътибор ўз натижасини бермай қолмаган. Теурийлар замонида мамлакат иқтисодиётининг ҳар бир соҳасида кузатилган жуда катта ижобий ўзгаришлар нафақат илм-фан, меъморчилик ва бошқа жабҳалар ривожига ўзига хос куч-қувват ролини ўйнай бошлади, балки умуман жамият ҳаётида мутлақо ўзгача сифат ўзгаришлари юз беришига асос яратди. Бундай сифат ўзгаришлари ушбу давр иқтисодий ҳаётини характерловчи белгилардан бўлган шаҳарлар, бутун бошли соҳалар ва ҳатто бозорларда (масалан, “Бобурнома”да келтирилган Самарқанд бозорларининг ихтисослашуви тўғрисидаги фикрларни эслайлик) чуқур ижтимоий меҳнат тақсмоти юз беришида ўз

аксини топади. Мамлакатдаги йирик шаҳарларнинг ҳар бири ишлаб чиқаришнинг муайян тури билан дунёда ном қозонгани, хунармандчилик соҳаларининг ҳар бир тармоғи доирасида ўнлаб ва ҳатто юзлаб ихтисосликларга бўлиниш юз берганини кўриш мумкин. Ваҳоланки, феодал даврлардаги натурал хўжалик, қолаверса, натурал айирбошлашга асосланган иқтисодиёт учун бу даражада чуқур меҳнат тақсмоти хос эмас эди. Буларнинг барчаси мамлакатнинг ўрта асрларда дунёнинг бирор жойида кузатилмаган ҳолат, яъни юксак даражада бозор-пул муносабатларига тортилганидан далолат беради. Ҳолбуки, ушбу хусусият капитализмнинг илк босқичларида турган давлатларга хослигини тарихчилар ва иқтисодчилар яхши билади.

Ўлка иқтисодий ҳаётини ўрганган олимлар бу даврга келиб, кенг истеъмол товарлари (айнан товарлари, яъни натурал айирбошлаш учун эмас, савдога чиқарилган маҳсулот) ҳажми, чакана савдо миқдори, қишлоқ аҳолисининг товар-пул муносабатларига тортилиш даражасига кўра нафақат мамлакатнинг марказий қисмлари, балки чекка ҳудудлари ҳам илгари мисли кўрилмаган ривожланишга эришганини эътироф этишади. XV аср охири – XVI аср бошларида кузатиладиган бундай ҳолатлар, тадқиқотчилар фикрига кўра, тарихимизда на олдин ёки на кейин учрайди. Бу каби тарихий, исбот талаб

эркинлик, ҳудудларда бизнес муҳитини яхшилашга катта аҳамият қаратилаётгани бежиз эмас. Ўтган икки Уйғониш даврида миллатимиз қўлга киритган ютуқларга таянган омишлар бу йўлнинг нақадар тўғрилигини қайта ва қайта исботлаб турибди.

“Тадбиркор бой бўлса, халқ ҳам, давлат ҳам бой бўлади”, “Тадбиркор нафақат ўзини ва оиласини, балки халқни ҳам, давлатни ҳам боқади” каби даъватлар тараққиётимизнинг “Янги Ўзбекистон” деб ном олган даври хусусиятларини очиб берувчи шиорларга айланди. Албатта, халқнинг иқтисодий ташаббускорлигини, тадбиркорлик субъектларини ҳар томонлама қўллаб-қувватлашга қаратилган саъй-ҳаракатлар нафақат моддий фаровонликнинг ошишига, балки унинг асосида юз берадиган сифат ўзгаришлари, ўз навбатида, катализатор сифатида жамиятнинг бошқа йўналишларида ҳам туб бурилишларга туртки беришига шубҳа йўқ.

Шу йил 24 сентябрь куни мамлакат раҳбари раислигида ўтказилган видеоселектор йиғилишида ҳудудларда тадбиркорликни ривожлантириш бўйича қўшимча чора-тадбирлар юзасидан бўлиб ўтган муҳокама Ўзбекистонда ушбу масалага берилаётган доимий эътиборнинг бир инъикосидир.

Юртимизда амалга оширилаётган кенг қўламли ислохотлар дунёда кечаётган “Тўртинчи саноат инқилоби” арафасида юз бераётгани яна

инқилоби” даврига ўтишни 1579 йили Утрехт унияси шаклланиши билан ниҳоясига етган Нидерландиядаги воқеалар, қолаверса, 1648 йили Англия революцияси билан боғлиқ равишда кўришга ўрганиб қолганмиз. Яъни, инсониятни тараққиётнинг янги палласига айнан шу давлатлар бошлагани тарихдан ўқитиб келинади. Ваҳоланки, юқорида келтирилган далиллар бу жараён бизнинг ўлкамизда улардан қарийб бир ва ҳатто бир ярим аср олдин шаклланиб улгурганидан далолат беради. Лекин минтақамиз нима учун тараққиётнинг капитализм деб номланувчи янги сифат даражасига ўта олмади, аксинча, кўп асрлик тушкунлик даврига кириб кетди? Ушбу саволнинг жавоби эса Учинчи Ренессансга қандам қўйишни мақсад қилган ҳозирги авлод учун ниҳоятда муҳим. Бу борада олимлар томонидан турлича сабаблар келтирилади. Хусусан, карвон йўлларининг жаҳон савдосида ўз аҳамиятини йўқотиши, буюк кашфиётлар туфайли денгиз йўлларининг очилиши ва шу кабилар... Ушбу ташқи омишлар билан бир қаторда ўлканинг инқирозга юз тутишида ички омишлар ҳам етарлича бўлганига шубҳа йўқ. Олимлар бу борада ҳам қатор жиҳатларни санаб ўтади. Уларнинг нуқтаи назарини инкор қилмаган ҳолда бир фикрни илгари сурмоқчи эдик. Жамиятшуносликка оид қарашлардан яхши маълумки, иқтисодиётда туб ўзгаришлар жадал суръатлар

ҳам жуда катта эътибор қаратилган, яъни ислохотларнинг комплекс характери таъминланган. Хусусан, давлат ва жамият ҳаётини ислоҳ қилиш режалар мажмуида алоҳида ўрин тутди. Ўзбекистон бирмунча мураккаб бўлса-да, энг тўғри йўлдан, яъни жамият ҳаётининг барча жабҳаларига бир-бирига боғлиқ компонентлар сифатида ёндошиб, уларнинг барчасини қамраб олган комплекс ислохотларни амалга ошириш йўлидан бораётир. Бу эса тарихимизда, қолаверса, бошқа давлатлар тажрибасида бугунги кунда кузатилаётган камчиликлар, аниқроғи, ислоҳ қилинаётган соҳани бундай янгиликлардан четда қолган бошқа соҳалар орқага тортиши мумкинлиги каби ҳолатларнинг олдини олади.

Хулоса ўрнида шуни айтиш мумкинки, миллатимиз тарихида ўзига хос юксак ривожланиш босқичлари бўлмиш Уйғониш даврларнинг ҳар иккаласи пойдеворида фан ютуқларига таянган иқтисодий юксалиш ҳамда унинг етакчилари бўлган тадбиркор ва ишбилармонлар қатлами тургани аниқ. Айнан тадбиркорлик ва илм-фан ҳамкорлиги Учинчи Ренессанс йўлида амалга оширилаётган ишларда ҳам ўзига хос локомотив бўлиб қолаверади. Давлатимиз томонидан бугунги кунда ушбу соҳаларга берилаётган эътибор эса тадбиркорликнинг яна бир бор халқимиз олдида ўз тарихий миссиясини бажаришига ҳеч қандай шак-шубҳа қолдирмайди.

Президентимиз Шавкат Мирзиёевнинг Бирлашган Миллатлар Ташкилоти Бош Ассамблеясининг 75-сессиядаги нутқи мазмун-моҳияти партиямиз томонидан атрофлича ўрганиляпти, таҳлил қилиняпти. Давлатимиз раҳбари илгари сурган таклифлар, ташаббуслардан келиб чиқилган ҳолда сиёсий кучнинг ҳаракат дастурлари, “йўл харита”лари ишлаб чиқилляпти, устувор вазифалар белгиляняпти.

О‘зЛиДеР Сиёсий Кенгаши Ижроия қўмитаси ва Олий Мажлис Қонунчилик палатасидаги фракциямизнинг видеоконференцалоқа шаклидаги кенгайтирилган йиғилиши ҳам ана шу муҳим масалага бағишланди.

Сўзга чиққанлар бутун инсоният тараққиётига хизмат қилиб, мамлакатларни бирлаштирадиган даъватлар Президентимизнинг БМТ минбаридаги чиқишлари орқали бутун сайёрамизга тарқалгани, тинчлик ва бунёдкорлик ғоялари билан суғорилган, умумий манфаатларга қаратилган таклиф ва ташаббуслар эса баҳс-мунозараларга ўрин қолдирмаганини эътироф этдилар.

Олий Мажлис Қонунчилик палатаси Спикери ўринбосари, фракциямиз раҳбари, О‘зЛиДеР Сиёсий Кенгаши Ижроия қўмитаси раиси Ақтам Хаитов хизмат сафаридан бўлгани боис Жиззахдаги студияда туриб

О‘зЛиДеР Сиёсий Кенгаши Ижроия қўмитасида

Кенг кўламли ташаббуслар қўллаб-қувватланмоқда

фикр билдираркан, давлатимиз раҳбари юксак минбардаги нутқида ўткир ва долзарб халқаро ташаббусларни илгари сургани Ўзбекистоннинг БМТ доирасидаги муҳим халқаро ташаббуслар ижодкорига айланиб бораётганини халқаро миқёсда яна бир бор намоён этганини қайд этди.

– Хусусан, пандемиялар даврида давлатларнинг ихтиёрий мажбуриятлари тўғрисидаги халқаро кодексни ишлаб чиқиш таклиф этилди, – деди Ақтам Хаитов. – Ушбу ҳужжатда ҳар бир давлатнинг ўз фуқаролари ва халқаро ҳамкорлари олдидаги мажбуриятлари акс этиши лозимлиги таъкидланди. Ҳақиқатан ҳам, бугунги кунда шундай масалалар юзага келяптики, бу муаммоларни бирорта мамлакат яқка ҳолда ҳал этиши амримаҳол. Коронавирус пандемияси ана шу жараёнга ёрқин мисолдир. Юртбошимиз маърузасида баён қилинган таклифлар, ташаббуслар партиямизнинг тегишли “йўл харита”лари, иш режалари учун дастуриламал бўлиб хизмат қилади. Ишончим комилки, бор салоҳиятимизни ишга солиб, нуфузли минбарда

тилга олган ғояларнинг рўёбга чиқишига муносиб ҳисса қўшамиз.

– Давлатимиз раҳбари нутқида қайд этилишича, мамлакатимиз биринчи марта камбағалликни камайтириш ҳақидаги қатъий қарорини очиқ эълон қилди, – деди парламент куйи палатаси депутати, фракциямиз аъзоси Мавлуда Хўжаева. – Бунга тадбиркорликни ривожлантириш ва қўшимча иш ўринлари яратиш, инвестиция ва бизнес муҳитини яхшилаш ҳамда замонавий инфратузилмани барпо этиш, одамларни янги касб-хунарларга ўргатиш ва аҳолига манзилли ижтимоий ёрдам кўрсатиш орқали эришяпмиз. Бандлик муаммосини ҳал этиш, оилалар фаровонлигини ошириш, демакки, камбағаллик билан курашишда кичик бизнес ва хусусий тадбиркорликни ривожлантириш муҳим ўрин тутди. Бугун меҳнатга лаёқатли инсон ўзи учун даромадли машғул топ олади. Масалан, бу йил “Ҳар бир оила – тадбиркор” дастурини амалга ошириш учун 4 триллион сўмдан зиёд маблағ йўналтириляпти.

Эндиликда партиямиз аҳо-

лининг тадбиркорлик қобилиятларини рўёбга чиқариш борасидаги саъй-ҳаракатларни бирлаштириш, мазкур йўналишда тажриба алмашинувларни йўлга қўйиш сингари ишларга янада кўпроқ эътибор бериши, бу борадаги фаолиятини такомиллаштириши тақозо этиляпти.

Олий Мажлис Қонунчилик палатаси депутати, О‘зЛиДеР фракцияси аъзоси Равшан Мамутов қайд этганидек, Ўзбекистон раҳбари ўз нутқида озиқ-овқат хавфсизлиги муаммоси, қашшоқликка барҳам бериш ва камбағалликни қисқартиришга қаратилган муҳим ташаббусни илгари сургани бежиз эмас. Сабаби, ҳозир бутун дунёда кечаётган пандемия туфайли ҳар бир киши озиқ-овқат хавфсизлигини таъминлаш масаласи долзарб аҳамият касб этганига гувоҳ бўлди. Айнан пандемия сабабли мамлакатлар ўртасидаги ўзаро алоқаларда узилишлар рўй берди, натижада аҳолисини озиқ-овқат маҳсулотлари билан таъминлашни йўлга қўймаган давлатлар фуқароларига очлик бевосита таҳдид сола бошлади. Бошқача айтганда, пандемия ҳар бир давлатга ўзининг ички

ресурсларини қайтадан кўриб чиқиб, фойдаланилмаган имкониятларини ишга солиши лозимлигини кўрсатди.

Албатта, юксак минбардан айтилган ташаббус ва таклифлар мамлакатимиздаги етакчи сиёсий куч – О‘зЛиДеР ва унинг парламентдаги фракцияси зиммасига муҳим вазифалар юкланганини англалади.

Мулоқотда Қонунчилик палатаси депутатларидан Эркин Зоҳидов, Абдулла Асланов, Зафар Худойбердиев, партиянинг Тошкент шаҳар Кенгаши раиси Равшан Фозилов ва бошқалар БМТдек нуфузли минбарда Президентимиз томонидан ўртага ташланган ташаббус ва таклифлар нафақат Ўзбекистон ёки минтақа, балки бутун дунё аҳлини ташвишга солаётган глобал муаммоларга бевосита дахлдор эканини алоҳида таъкидлашди.

Қўшма мажлисда “Ўзбекистон Республикаси Президенти Шавкат Мирзиёевнинг 2020 йил 23 сентябрь куни Бирлашган Миллатлар Ташкилоти Бош Ассамблеясининг 75-сессиясида сўзлаган нутқидан келиб чиқиб, О‘зЛиДеР томонидан амалга оширилдиган чора-тадбирлар режаси” ишлаб чиқилди. Унга мувофиқ 12 йўналиш бўйича 100 га яқин чора-тадбирлар амалга оширилади. Белгиланган вазифалар бажарилишига ҳамкор ташкилотлардан тортиб партиянинг энг қуйи бўғинларигача жалб этилади.

О‘зЛиДеР Сиёсий Кенгаши Ижроия қўмитаси матбуот хизмати

Дунё манфаати кўзланган таклифлар

Нафақат маҳаллий, айна пайтда хорижлик журналист ва экспертлар ҳам БМТ ташкил этилганининг 75 йиллик юбилейи мамлакатлар ўртасида ўзаро ҳамкорлик кўламлини кенгайтириш, бутун дунёда барқарорлик, ривожланиш, шунингдек, фаровонлик йўлида биргаликдаги ишларнинг янги йўналишларини белгилаб олишга замин яратаётганини алоҳида таъкидлаяпти.

Давлатимиз раҳбари жаҳон ҳамжамиятини ушбу ташкилот атрофида янада жипслашишга, коронавирус глобал миқёсда тарқалмаслигининг олдини олиш борасидаги саъй-ҳаракатларни умумлаштиришга чақиргани мамлакатлар ўртасидаги ўзаро алоқаларнинг мустаҳкамланиши, пандемия туфайли вужудга келган кутилмаган вазиятга мослашишга кўмалашиши билан долзарб ўрин тутди.

Кези келганда, БМТ Бош Ассамблеяси сессиясида маъруза қилиш имконияти ҳаммага ҳам берилвермаслигини унутмаслик жоиз. Бунда давлатнинг ички ва ташқи сиёсати, халқаро майдондаги обрў-эътибори, дунёда тинчлик-осойишта-

ликни таъминлашдаги амалий ишларга устунлик берилади, албатта.

Шавкат Мирзиёев ўз нутқида илгари сурган ташаббуслар илмий тадқиқини сиёсатшунос мутахассисларга ҳавола этган ҳолда Ўзбекистон таклиф этаётган масалалар наинки бизга хайрихоҳ бўлганлар, балки ҳар бир чиқишнинг “минус”ини топишни ўзига касб қилганларнинг ҳам диққатини жалб этаётганини айтиб ўтмасак бўлмайди.

Хўш, бу жиҳатлар қайси йўналишларда яққол акс этади?

Даставвал, қашшоқликни тугатиш ва камбағалликка қарши курашишни Бош Ас-

самблеянинг галдаги сессияси асосий мавзуларидан бири сифатида белгилаш ҳамда унга бағишланган глобал саммитни ўтказиш таклифини олиб кўрайлик. Ҳозирги глобаллашув ва кескин рақобат жараёнида шу мавзу кун тартибининг энг асосий масаласи бўлиб қолаётганини инкор этиб бўладими? Пандемия сабаб бу муаммоларни барча давлатлар биргаликда ҳал этиши оқилона ечим экани ҳеч кимга сир эмас.

Транспорт-коммуникация алоқаларини ривожлантириш минтақавий марказини очиш таклифи ҳам жуда долзарб масала сифатида юксак минбарда айтилгани аҳамиятлидир. Чунки бу борадаги алоқалар янги босқичга кўтарилса, минтақамиздаги мамлакатлар билан яқин қўшничилик ва ўзаро ишонч, дўстлик ва ҳурмат муҳити янада яхшиланади.

Ушбу мураккаб даврда Ўзбекистон халқаро ҳамжамиятда алоҳида хавотир ва ташвиш уйғотувчи озиқ-овқат хавфсизлигини таъминлашга масъулият билан ёндашиши экспертлар

томонидан эътироф этилаётгани ҳам кейинги йилларда юртимизда амалга оширилган изчил ислохотлар самарасидир. Зотан, аҳолининг барча қатламларини соғлом ҳаёт учун зарур бўлган миқдорда хавфсиз, сифатли озиқ-овқат маҳсулотлари билан таъминлашга ҳаммининг ҳам салоҳияти етмаслиги мумкин. Бундай шароитда ички бозорни озиқ-овқат билан тўлдириш, ишлаб чиқариш соҳасида ўз-ўзини таъминлашга эришиш Ўзбекистон иқтисодиётининг муҳим сектори ҳисобланган қишлоқ хўжалигини ривожлантиришда устувор йўналишлардан бири экани шубҳасиз.

Оддий сўз билан айтганда, Ўзбекистон ўзининг озиқ-овқат хавфсизлигини таъминлаш баробарида қишлоқ хўжалиги маҳсулотларини экспорт қилиш орқали бошқа мамлакатларнинг озиқ-овқат таъминотида ҳам ҳисса қўшмоқда. Кўриб турганингиздек, юқорида тилга олинган ташаббусларнинг аксарияти у ёки бу маънода партиямиз электорати – тадбиркор

ва фермерлар, интеллектуал мулк эгаларининг фаолияти билан ҳар томонлама боғлиқ. Шунинг учун ҳам Президентимиз нутқининг мазмун-моҳиятини Беруний туманидаги либерал-демократларга атрофлича тушунтириш, ташаббусларнинг халқаро аҳамиятини тарғиб қилиш юзасидан тизимли ишлар амалга оширилмоқда.

Бунда О‘зЛиДеР Сиёсий Кенгаши Ижроия қўмитаси ва партиянинг Олий Мажлис Қонунчилик палатасидаги фракциясининг видеоконференцалоқа шаклидаги кенгайтирилган йиғилишида берилган тавсиялар муҳим аҳамият касб этаётир. Хусусан, Ўзбекистоннинг БМТ доирасидаги муҳим халқаро ташаббуслар ижодкорига айланиб бораётгани билан боғлиқ мулоҳазалар нафақат партиямизнинг фаол аъзолари, балки минглаб тарафдорларида, ёш авлод вакилларида катта қизиқиш уйғотмоқда.

Бахтиёр КУШАКЕЕВ, О‘зЛиДеР Беруний туман Кенгаши раисининг биринчи ўринбосари

Мавзуга қайтиб...

Тошкент вилояти ҳокими Рустам ХОЛМАТОВ диққатига!

103 кун ўтди

лекин ўрта Чирчиқ тумани ҳоқимлиги миқ этмади!

Президент Шавкат Мирзиёев ОАВ, яъни журналист ва блогерлар билан ҳамкорлик қилишни истамаётган раҳбарлар, шу жумладан, ҳоқимлар билан ҳам хайрлашиш фурсати келганини қайта-қайта таъкидлаётган бир пайтда пойтахт ёнгинасида жойлашган Ўрта Чирчиқ тумани ҳоқимлиги ва прокуратураси мутасаддилари республикада етакчи партия муассислигида чоп этилаётган “XXI asr” газетасида бундан тўрт ой бурун босилган танқидий мақолада кўтарилган муаммолардан наҳот беҳабар бўлса?!

Тасаввур қияпсизми, битта зўравон айни ёз чилласида ҳе йўқ, бе йўқ, уйингиз ёнгинасига кам эмас, уч машина энг бадбўй ва захарли ҳид тарқатувчи товук гўнгини ағдариб кетса, нима қиласиз? Яна денг, танқидий мақола босилгач, июль ойи бошларида Ўрта Чирчиқ тумани ҳоқими Олимжон Нурматов, туман прокурори бир гуруҳ вакиллар билан ўша маҳаллага бориб, вазиятдан хабардор бўлса-ю, ҳалиги фермер на ҳоқимни, на прокурорнинг топширигини заррача писанд қилмасдан, ер остига кириб кетган каби нақ 103 кундан буён ҳам йўл қўйган хатоларини тузатмаса. Ёки ўлганнинг устига тепгандек, ҳа, шикоят ёзувдинларми, баттар бўлинглар, газетангиз нима қилиб берарди, дегандек гўнг устига тупрок

септириб, устингиздан қулиб юраверса, қандоқ чидаш мумкин?

Бугун яна мажбур бўлдик ушбу мавзуга қайтишга. Сабоби, Ўрта Чирчиқ туманидаги “Тараққиёт” маҳалла фуқаролар йиғинига қарашли Усмон Юсупов кўчасидаги ҳолат юзасидан шу йилнинг 25 июнида чоп этилган **“БАҲОДИР КИМНИНГ ЭРКАСИ ЁХУД ҲОКИМ ВА ПРОКУРОР НОМИНИ СОТИШДАН ҚАНДАЙ НАФ БОР?”** сарлавҳали танқидий мақолада тилга олинган муаммолардан лоақал биттасиям ижро қилинмаганидир.

Бугун шу маҳаллада яшовчи, тиниб-тинчимас Гулнора опа Пардаева яна бизни безовта қилди:

– Бизларни-ку ҳоқимият шу вақтгача алдаб келди. Наҳотки, республика миқёсидаги газетаниям булар чалғитган бўлса, деб ҳайрон қолиб ўтирибман.

Тўрт ойки, йўл қараймиз. Танқидий мақола чиққач, ҳоқим бува бир гуруҳ одамлари билан келиб, маҳалламиз ва ҳеч кимни бир пулга олмай, ўзбошимчалик билан ўз билганидан қолмаётган Баҳодир Умаров бошчилигидаги “Ақромали Дилором” боғдорчилик фермер хўжалиги майдонида қурилган ноқонуний қурилишларни кўрди. Бузиш учун техникалар ҳам олиб келишган экан. Кейин ҳовлилар ёнига тўкиб кетилган, ҳамма ёққа бадбўй ҳид тарқатиб ётган уч машина товук гўнгини шарбат қилиб оқизвориш ҳақида кўрсатма бериб жўнаб кетди. Ишонасизми, айтилган бирорта топшириқ бажарилмади. Мени ҳайрон қолдиргани, бу Баҳодир Умаров дегани шу даражада ўзбошимча эканки, ҳалиги гўнглари устига озгина тупрок тўктириб, плёнка ёпишди ва шу ҳолича тўрт ойдан бери сасиб, бижғиб ҳаммани захарлаётганига ҳам парво қилмади.

Давлатга қарашли ерда шахсий уй-жой ва молхона қуриш мумкинми? Ички йўл ўрнига ариқ қовлаттириб, томорқаларга сув ўтказмаётганига нима дейсиз? Яна денг,

шу ҳудуддаги ерларни бир пайтлар учта оила ноқонуний равишда эгаллаб, иккитаси уй қуриб олган, бири эса мустақам пойдевор ташлаттириб қўйганди. Ҳоқимлик, суд идораларига тўхтовсиз мурожаат қилаверганим сабабли ўтган йили улардан биттаси бузиб ташланди, холос. 2019 йили туман ҳоқимлиги, ер тузиш ва кадастр хизматлари, хуллас, фермер Баҳодир Умаровнинг ўзи ҳам суғориладиган, бевосита давлатга қарашли майдонда уй-жой қуриш учун турли қинғир йўллар орқали А. Умаров ҳамда М. Абдужабборовога ноқонуний равишда ҳоқим қарори чиқариб берилгани юзасидан қилган мурожаатим Тошкент вилоят прокуратураси томонидан пухта ўрганилиб, туманимизда қатор шахсларнинг айнан шу ҳудуд бўйича жинсий хатти-ҳаракатлар содир этгани аниқланган, тегишли тартибда назоратга олинган эди. Афсуски, ижро амалиёти амалга ошмай чала қолиб кетди.

Хайриятки, шу йил 2 октябрь куни Нурафшон шаҳрида Республика ишчи гуруҳи қабули уюштирилди ва мен

Ўзбекистон бош прокурори ўринбосари Светлана Ортиқовага “Тараққиёт” МФЙ ҳудудида содир этилаётган қонуний ҳолат юзасидан мурожаат этдим ва ҳар доим халқ тарафида бўлган Светлана опа дарҳол тегишли идораларга топшириқ берди. Энди ижросини кутиб ўтирибман.

Очиғи, биз ҳам ўз оиласига дахлдор масалалар билан эмас, аксинча, маҳалла аҳлини қийнаётган ташвишлар билан қатор идораларни безовта қилишдан тинмаётган Гулнора Пардаеванинг келтираётган барча ваз-корсонлари ҳақиқат дейишдан тийиламиз. Лекин ушбу мақолада келтирилган далиллар ростлигига ўзимиз ҳам ўша ҳудудда бўлиб ишонч ҳосил қилдик. Шу ердаги одамлар билан ҳам гаплашдик. Муаммолар жиддий.

Вақт шамолдай ўтиб боряпти. Бу ёғи қиш қилич қайраб турибди. Одамларни рози қилиш жараёни осон кечмаётгани биргина Ўрта Чирчиқ мисолида ҳам исботини топаётир. Биз эса ушбу мавзуга бошқа қайтмаймиз деган умиддамиз!

ТАҲРИРИЯТ

Конференция

“Ёшлар қаноти” – ёшларга қаноти

О‘zLiDeP Марғилон шаҳар Кенгаши 2 209 нафар аъзони жамлаган. Ҳудудда 44 та бошланғич партия ташкилоти мавжуд бўлиб, аъзоларнинг 900 дан ортигини ёшлар ташкил этади.



Бу ҳақда кенгаш “Ёшлар қаноти”нинг навбатдаги конференцияси-

да таъкидланди. Ўтган йили “Ёшлар қаноти” 60 га яқин тад-

бирида 2 000 дан ортиқ йигит-қизни қамраб олгани ҳам алоҳида эътироф этилди.

– “Депутат ва ёшлар” учрашуви мунтазам ташкил этилиб, навқирон авлод муаммоларига ечим изланади, таклиф ва ташаббуслари қўллаб-қувватланади, – деди учрашувда сўз олган Кенгаш ижрочи котиби Абдубанноб Маҳкамов. – Натижаси ўлароқ 20 дан ортиқ ёш ўз тадбиркорлигини йўлга қўйди. “Ёшлар қаноти”



мунтазам равишда Ўзбекистон ёшлар иттифоқи шаҳар кенгаши, “Ёшлар – келажагимиз” жамғармаси билан ҳамкорликда ишляпти. Ёш ишбилармонларнинг муаммоларини ўрганиб, амалий ечим топишда ишчи гуруҳ қараб тургани йўқ.

Конференцияда “Ёшлар қаноти” жамо-

атчилик Кенгашининг 9 нафардан иборат янги таркиби иштирокчилар томонидан тасдиқланди. Ўзбекистон ёшлар иттифоқи Марғилон шаҳар кенгаши раиси Шохистахон Маматбоева партиянинг Марғилон шаҳар Кенгаши раисининг Ёшлар масалалари бўйича жамоатчилик асосидаги ўринбосари

этиб сайланди.

Вилоятда “Ёшлар қаноти”нинг ҳисобот-сайлов конференциялари кўтаринки руҳда давом этмоқда.

Жавоҳир ШАМСУДДИНОВ,
О‘zLiDeP Фарғона вилояти Кенгаши ёшлар билан ишлаш бўлими муdiri

Семинар

Ўқувлар уқувни ҳам ошириши керак-да!

Кеча маҳаллий кенгашлардаги депутатларимиз, партия тузилмалари матбуот хизматлари ходимлари учун онлайн тарздаги навбатдаги махсус сиёсий ўқув бўлиб ўтди. O'zLiDeP Сиёсий Кенгаши Ижроия қўмитаси Сиёсий таълим маркази томонидан ўтказилган машғулотда “Партиявий ишлар, ғоявий-сиёсий тадбирларни ОАВда ёритишнинг асосий жиҳатлари” мавзуси бўйича сабоқлар берилди.

Мазкур тадбир тегишли дастурга асосан бир неча ойдан бери уюштирилаётган, сафдошларимиз билими, дунёқараши, савиясини

цептуал, балки йирик сиёсий зиддиятларни ҳам келтириб чиқаряпти. Яна бир факт: йирик молиявий операциялар ОАВ хабарлари ҳисобга

фаолиятигача қамраб олинаётгани ҳам қувонарли. Бунинг шарофати билан кенг жамоатчилик партия амалга ошираётган лойиҳалар, турли-туман тадбирлар ва режалардан яши хабардор. Шу билан бирга, фаолиятимиз ва ҳамкорлигимиз билан боғлиқ камчиликлардан ҳам кўз юммаслигимиз зарур. Назаримда, дастлаб шунини айтиш керакки, бир-иккитасини истисно қилганда, вилоят



янада ўстиришга қаратилган туркум маҳорат дарсларининг охириги қисми эканини қайд этиш жоиз.

Дастлаб **Сиёсий таълим маркази раҳбари Насимжон Алимов** сўз олиб, партия ғояларини оммалаштириш, нуфузини юксалтириш, сиёсий куч тарафдорлари, хайрихоҳларини кўпайтиришда оммавий ахборот воситаларининг аҳамияти беқиёс эканини таъкидлаб, ОАВ имкониятларидан оқилона фойдалана олган партиягина муваффақиятга эришишини урғулади.

Таниқли журналист, филология фанлари бўйича фалсафа доктори (PhD), Ўзбекистон журналистика ва оммавий коммуникациялар университети ўқитувчиси Беруний Алимовнинг маърузачи сифатида қатнашиши тингловчиларда катта қизиқиш уйғотди. У “Рангли PR технологиялар. Ахборий маданият менежменти” мавзуси бўйича сабоқ берди. Қайд қилинганидек, PR – public relations, яъни жамоатчилик билан алоқалар партия фаолиятини ёритишда энг самарали восита саналади. ...Экспертларнинг маълум қилишича, юксак тараққий этган ва ривожланаётган мамлакатларнинг ахборот-коммуникация технологиялари соҳасидаги салоҳияти, имкониятлари орасидаги фарқ наинки кон-

олинган ҳолда олиб борилади. Демак, журналистика ҳаётимизга биз ўйлагандан ҳам кўра кучлироқ таъсир кўрсатади. Маърузачи “оқ”, “қора”, “сарик”, “яшил”, “қулранг” PR технологияларни атрофлича шарҳлади, улар қўлланилишига доир масалаларни таҳлил қилди.

“XXI asr” ижтимоий-сиёсий газетаси бош муҳаррири **Норқобил Жалилов** ўз сўзида, аввало, мазкур йўналишдаги ютуқлар, ижобий хусусиятлар билан бирга ОАВлар ўртасидаги жиддий рақобат муҳити ҳамда бу борада йўл қўйилаётган нуқсонлар хусусида атрофлича тўхталди.

– Журналистика йўналишида ишлаётган фаолларимиз замон билан ҳамнафас бўлишга интиляпти, замонавий ахборот технологияларидан унумли фойдаланяпти, кўпроқ фото, видеоматериалларга урғу беряпти, шунингдек, тезкорликка, материалларнинг ихчам бўлишига катта аҳамият қаратяпти, – деди у. – Партия тузилмалари нафақат сайтлар, балки телевидение, радио билан ҳам самарали ҳамкорлик қилаётганини қўллаб-қувватлаш керак. Тадбирлар ёритилишида расмиётчиликдан қочишга ҳаракат қилинаётгани ҳам таҳсинга лойиқ. Бошлангич ташкилотлардан тортиб, парламентдаги фракциямиз

кенгашлари ҳузуридаги аксарият матбуот хизматлари ходимлари электоратимиз манфаатидан келиб чиққан ҳолда таҳлилий ва танқидий материаллар тайёрламаяпти. Ваҳоланки, уларга одамларда қизиқиш кучли. Бундан ташқари, матбуот хизматлари ходимларининг кўпчилиги матн билан талаб даражасида ишлалмаяпти. Мавзулар, жанрлар, услублар борасида ранг-баранглик йўқ, ҳамма материаллар бир қолипдан чиққандек. Шу сингари масалалар ечими кадрларга бориб тақалади. Шу ҳақда жиддий бош қотиришимиз лозим.

Партия нашри бош муҳаррири обуна, газетани етказиш, ижодий рақобат ва бошқа масалалар тўғрисида ҳам муфассал сўз юритди.

O'zLiDeP Сиёсий Кенгаши Ижроия қўмитаси матбуот хизмати раҳбари Элмурод Панжиев, партиянинг дастурий кўрсатмаларини ишлаб чиқиш, чуқурлаштириш ва мафкуравий ишлар бўлими мудири Акбар Музаффаров маърузалари ҳам қизғин мунозараларга сабаб бўлди, аниқ ва асосли таклифлар илгари сурилишига туртки берди.

Беҳзод ИСРОИЛОВ,
“XXI asr” мухбири

Суратни
Шухрат РАҲИМОВ олган.

O'zLiDeP Навоий вилояти
матбуот хизмати хабар қилади



Ёшлар пресс клуби ташкил этилади

“Ёшлар қаноти” конференцияси Навоий вилоятининг Навбаҳор туманида ҳам бўлиб ўтди.

Навбаҳорлик ёшларни бир жойга жамлаган ушбу тадбирда Кенгаш “Ёшлар қаноти”нинг 9 ойлик фаолияти сарҳисоб қилинди. Шунингдек, “Ёшлар қаноти” жамоатчилик кенгаши кўмагида ёшлар билан ишлаш самарадорлигини янада ошириш, уларни эзгу мақсадлар йўлида жипслаштириш, фаолиятини такомиллаштириш масалалари ҳам муҳокама этилди. Фаолларнинг таклифига асосан галдаги вазибалар учун чора-тадбирлар “йўл харитаси”ни тузиш ҳамда тасдиқлаш, партиянинг Навоий вилоят “Ёшлар

қаноти” жамоатчилик кенгаши конференциясига делегатлар сайлаш масалалари кўриб чиқилди.

Шу куни конференцияда сиёсий кучнинг Навбаҳор туман Кенгаши “Ёшлар қаноти” жамоатчилик кенгаши раислигига O'zLiDeP Навбаҳор туман Кенгаши раисининг ёшлар масалалари бўйича ўринбосари, Навбаҳор туман халқ таълими бўлими мудири Х. Раҳматов номзоди маъқулланди.

Халқ депутатлари вилоят Кенгаши депутати Б. Пирнафасовнинг таклифига кўра, “Ёшлар қаноти” жамоатчилик кенгаши қошида Ёшлар пресс клубини ташкил этишга келишиб олинди.

Фаолиятсиз депутатдан фойда йўқ



– Депутатни халқ сайладими, энди у ҳам одамларга қайишиши керак-да. Ҳамон лоқайд, уйғонмаган ноиблар бор орамизда. Шундайларни ҳаракатчан бўлишга ундашимиз лозим, – деди Халқ депутатлари Навоий шаҳар Кенгаши депутати **Икром Шадиев.**

Кўпчилик фаоллар паст кўрсаткичга эга ноибларни илғор депутатларга бириктириш орқали уларда ишчанлик қобилиятини шакллантириш таклифини ўртага ташлашди. Бундан ташқари, шаҳар депутатларининг уюшган ҳолда фаолият олиб боришлари мақсадга мувофиқ деб топилди.

Тадбирда депутатлар ва

партия фаоллари ўртасида кескин мунозара авж олди. O'zLiDeP шаҳар Кенгаши аппарат раҳбари Ф. Назаровнинг ҳисоботи тинглангач, партия аъзоларининг сони ўсгани таъкидланди. Қуйи бўғинлар фаолияти, аъзолик бадалларини назорат қилиш масалалари таҳлил этилди.

Партия шаҳар Кенгаши раиси А. Мирзаев маърузасида қуйи тузилмаларда тарғибот-ташвиқот ишлари сустлиги, депутатлар яқдиллик билан ҳаракатга киришиб, эътирофга лойиқ ишларни амалга ошираётган бўлса-да, айримлари мутлақо фаолиятсиз экани очиқ айтилди. Айниқса, назоратдан четда қолиб кетган аҳоли мунозараларига алоҳида эътибор қаратиш лозимлиги таъкидланди.

Расул КУШЕРБАЕВ: Мен бирор нарсада айбланиб, судланмаяпман!



Яқинда жиноят ишлари бўйича Оққўрғон туман судида гувоҳ сифатида чақирилиб, саволларга жавоб берганим ҳақидаги ахборотларни айримлар депутатни жавобгар сифатида сўроққа тутишдек тушунибди. Йўқ, бундай эмас, мен бирор нарсада айбланиб, судланмаяпман.

Аслида, судга гувоҳ сифатида чақиртирилган ҳар қандай шахс мансаб ва мавқеидан қатъи назар, ўша жараёнда иштирок этиши лозим. Керак бўлса, вазир ёки давлат раҳбарининг ҳам судга гувоҳ сифатида чақирилиши демократик давлат учун нормал ҳолат ҳисобланади. Бизда бундай воқеалар кам учрагани учун юқоридаги каби тушунарсиз саволлар пайдо бўлгандир. Шахсан мен адолат учун зарур бўлса, ҳар қандай шахс, осмонга чиқиб кетган бўлса ҳам, судга чақирилдим, борса, бирор жойи камайиб қолмайди деб ҳисоблайман.

Шу сабабли ўзим туғилиб ўсган қишлоғимда фаолият юритаётган тадбиркорларнинг жиноят ишида мен билан боғлиқ турли кўрсатмалар олишга уринишлар бўлгани айтилгани учун вазиятга ойдинлик киритиш нуқтаи назаридан суднинг чақирилишимни табиий қабул қилдим ва сира иккиланмасдан, тўғри бордим. Бу, аслида, депутатнинг сайловчилари олдидаги бурчи ҳам ҳисобланишини унутмайлик.

Айни пайтда менинг нима учун ушбу суд жараёнига гу-

воҳ сифатида чақирилганим айримларга қизиқ бўлиши мумкин. Бунга қисқача тўхталадиган бўлсам, судда балиқчилик учун берилган ердаги тош-шағални сотишда айбланган судланувчи Ж.Зокиржонов тергов давомида ундан прокуратура ходимлари менга, яъни, депутат Кушербаевга қарши унинг оилавий бизнеси аслида менга тегишли эканлиги ҳақида кўрсатма бериш талаб қилингани ва босим бўлганини билдирган.

Билишимча, бу менинг давлат раҳбари ташаббусларидан руҳланиб, одамларга ёрдам бериш мақсадида айрим бой ва тўқ мансабдорларнинг думини босиб қўйганим билан боғлиқ бўлиши ҳам мумкин. Шу ҳақда эшитиб юргандим ва бу каби ҳолатлар бошқа тадбиркорлар билан ҳам ўзгача кўринишда рўй бериб, улар прокуратура билан боғлиқ муаммолари бўйича менга мурожаат қилишгани учун босимлар бўлганини билдиришганди. Афсуски, бу топшириқни берганларнинг куч-қудрати ва ушбу ҳолатда улардан қонунлар ҳам мени ҳимоя қилишига кўзим етмагани сабабли ҳозирча аниқ исм-фа-

милияларни айта олмайман. Бироқ мавриди етганда, албатта ошкор қиламан...

Муҳими, суд ишининг ошкора ва, айниқса, оммавий ахборот воситалари вакилларининг эркин иштирокида ўтказилгани мен учун ҳам кутилмаган ҳол бўлди. Чунки шунча гап-сўзлардан кейин ҳафсадам пир бўлган эди. Очиги, мен судда иштирок этиб, сўнгги йилларда бу тизимнинг мустақиллиги ва шаффофлигини ошириш бўйича Президент ташаббуси билан бошланган амалий ташаббусларнинг ниҳоят натижа бера бошлаганига гувоҳ бўлдим.

Суддаги битта тушунарсиз ҳолат: терговчининг судланувчидан депутатга қарши кўрсатма бер, деб талаб қилмагани ва босим ўтказмагани ҳақидаги жавоби, бироқ буни исботлаш учун сўроқ жараёнини видеоёзувга қайд этмагани бўлди. Аслида, қонун бўйича терговчи сўроқ жараёнини тўлиқ видеотасвирга олиши керак эди, аммо видеокамера йўқлиги боис терговчи буни қилмаган эмиш. Демак, у ана шу йўл орқали ўзининг “жиноят”ини яшироқчи бўлган, деган фикр келиб чиқади-да. Чунки ахборот технологиялари ҳаётимизда асосий ўрин эгаллаётган ва видеоёзувни ҳатто мобиль телефон орқали ҳам амалга ошириш мумкин бўлган бугунги вазиятда терговчининг ушбу важи жуда ўринсиз ва шубҳали эканлигича қолди.

Шу ўринда давлатимиз раҳбари Шавкат Мирзиёев сўроқ жараёнларини нима учун видеоёзувга қайд этиш зарурлигига бунчалик катта аҳамият бергани ва бу адолат, ҳақиқатни тиклаш учун қанчалик муҳим эканлигига яна бир бор амин бўлдим. Юқоридаги мисолдан кўриняптики, бу ишга жалб этилган терговчилар ва уни кузатиб ўтирган прокурорлар на-

қонун, на Президент талабини бажаришган. Ажабланарли томони, бунинг учун жавоб ҳам беришмаяпти.

Суднинг қолган тафсилотларига тўхталиб ўтирмайман, негаки, терговчининг “топшириқ” асосида айнан менга қарши кўрсатма олишга ҳаракат қилганига, жиноят иши мен учун “бююртма” эканига шубҳам қолмади, прокуратура ва терговчиларнинг холислигига ишончим камайди. Қанча мурожаат қилишимга қарамай, кутганимдек, улар сувдан куруқ чиқишди. Бироқ ўзим, оилам ва яқинларимнинг мазкур жиноят иши ордидан чеккан азоблари ҳаққи бу жараёни бир умр унутмайман...

Куни кеча эса ўша судланувчи ёш тадбиркор Ж.Зокиржоновнинг суд залидан озод қилиниб, жазоси енгиллатилиб, оиласи бағрига қайтганини эшитиб қувондим. Ёш тадбиркорнинг оиласи, маҳалла аҳли ва дўстларининг севинчини кўриб, ўзим ҳам кўп ойлардан буён чўзилиб келган тушунарсиз ва мен учун ташвишли кечган кунларнинг якун топаётганидан хурсандман.

Тўғриси, қийин бўлди: тадбиркор бошига тушган иш менинг фаолиятим билан боғлиқ, деган гап чиққани унинг оиласи ва қишлоқдошларим олдида бошимни эгиб қўйганди.

Судланувчи тадбиркор ва унинг акасига тадбиркорлик фаолияти давомида депутат сифатида кўп бора қонуний ёрдам берганим рост. Яширмайман, бундай машмашалардан сўнг менга мурожаат этаётганларга ёрдам беришга ҳам чўчиб қолдим.

Шунга қарамай, умид қилманки, ҳаммаси ордта қолди ва Президент ташаббусидан руҳланиб ишламоқчи бўлган депутатга, фуқарога қарши энди бунақа “иш”лар уюштирилмайди!



Андижонда газ ёнса, Булоқбошида тутуни

Халқимизда “Бўзчи белбоққа ёлчимас” деган нақл бежиз айтилмаган. Андижон вилоятининг Булоқбоши туманида газ кони топилганидан кўпчилик хабардор. Демак, нафақат туманни, балки бутун вилоятни ҳам табиий газ билан таъминлаш имкони катта. Лекин ўша ҳудуд яқингинасида жойлашган икки маҳалла аҳли бундай имкониятдан ханузгача маҳрум.

Туманнинг Кулла қишлоғидаги “Нефтчилар” ва “Кўприкбоши” маҳалла фуқаролар йиғинларининг муаммолари жуда ўхшаш. Масалан, “Нефтчилар”да 2019 йили “Обод маҳалла” давлат дастури доирасида қатор ишлар амалга оширилди. Хусусан, Валида кўчасига ичимлик суви олиб келинган яхши бўлди-ю, аммо қовланган йўллар шу ҳолича қолиб кетганидан кўпчилик

ранжиди. Ётқизилган қувурлар уч-тўрт ой кўмилмай, охири аҳоли ҳашар уюштириб, асфальтланмаса ҳам, йўлларни текислашга мажбур бўлди.

“Кўприкбоши” МФЙда ҳам худди шундай муаммолар кўп. Дўстлик кўчасидаги ички йўлларга одамларнинг ўзлари имкониятидан келиб чиқиб шағал ётқизишди. Асфальт қилишга қурбилари етмади, қоп-

қоп ваъдалар эса кўп бора бериб келинмапти.

Энди асосий муаммога ўтайлик: бундан ўн йиллар муқаддам ҳар икки маҳаллага табиий газ тармоғи тортилган ва аҳоли бу қулай имкониятдан самарали фойдаланганини бугун ҳамма хўрсиниб эслайпти. Нега десангиз, кейинчалик маълум ва номаълум сабабларга кўра бу ҳудуд газ тармоғидан узиб ташланган. Бугун кўпчилик бирлашиб, бу оғир муаммони ҳал этмоққа чоғланган. Икки маҳаллада жами уч мингга яқин фуқаро истиқомат қилади.

Аниғи, 4 километр узунликдаги ҳудуд газ билан таъминланиши керак. Ҳали у ташкилот, ҳали бу мутасаддига қилинган мурожаатлардан фойда чиқмагач, халқнинг ўзи маблағ тўплаб, ҳаракат қилишга мажбур бўлди. Йиғилган 200 миллион сўм атиги 2 километрга газ қувурлари ётқизишга етди, холос. Энди қолган

маблағни топиш қийин бўляпти.

– Очиғи, яна одамлардан пул сўрашга истиҳола қиляпмиз, – дейди маҳалла оқсоқоли Рўзивой Раҳмонов. – Трубалар нархи баланд. Имкон етмаяпти. Арзонроғини ҳам изладик, топилмади. Кўриб турибсиз, ҳудудда битта коллеж, 4 та мактаб, 4 та боғча, шифохона, гузар, савдо шохобчалари бор. Аҳоли хонадонларидан ташқари уларга ҳам табиий газ керак. Ҳадемай қиш келади. Яна қийинчилик бошланади. Ўтин-кўмирнинг нархи ҳам осмонда. Устига-устак, қанча кам таъминланган оилалар бор. Уларнинг ҳоли не кечади?


Булоқбоши тумани мутасаддилари ушбу муаммога ижобий ечим топармикан?

Зилола РАҲМОНОВА,
“XXI asr” мухбири

Премьера

“Ибрат”дан ибрат олаёйлик

“Ўзбекино” Миллий агентлиги буюртмасига биноан “Киномания” студияси томонидан суратга олинган “Ибрат” фильмининг премьераси аввал Наманган вилоятининг Тўрақўрғон туманида ўтказилгани бежиз эмас. Боиси, тарихшунос, тилшунос олим Исҳоқхон Ибрат айнан шу заминда туғилиб, вояга етган. Аини пайтда машҳур алломанинг номига қўйилган тиллар мактаби ва музей ҳам шу гўшада жойлашган.



Премьера давоми пойтахтга кўчди ва Алишер Навоий номидаги киносаройда тантанали равишда бўлиб ўтди. Яна бир эътиборли жиҳати, “Ибрат” фильми намойиши 4 октябрь куни ўтказилганида ҳам рамзий маъно бор, яъни 82 йил аввал айнан шу куни юртимизнинг кўплаб маърифатпарвар жадидлари қатағон қилинган. Утганларнинг хотираси ёд этилди.

Исҳоқхон Ибрат XIX аср иккинчи ярми ва XX аср бошида фаолият юритган

жадидлар орасида номи негандир кам тарғиб этилган боболаримиздан биридир. Фавқулудда истеъдод соҳиби бўлмиш Ибрат домланинг ҳаёти ва ижодий фаолияти афсонавий кечганини мустақиллик йилларига келибгина билдик. Афсуски, ҳозиргача тадқиқ этилаётган маълумотлар ҳали денгиздан томчи, холос. Тасаввур қилишга ожизмиз ҳамон, бир ярим аср аввал Фарғона водийсининг бир чеккасидаги қишлоқда туғилиб, вояга етган навқирон йигитнинг маърифат истаб, Фарбу Шарқни кезиб, зиёрат қилмоғи, ҳайратлиси,

20 та хорижий тилни пухта ўрганиши, тилшунослик ва тарихшунослик бобидаги изланишлари дунё аҳлини ҳайрон қолдириши табиий.

“Ибрат дунёсига сайр этиш, унинг маърифатидан баҳраманд бўлиш кино илҳосмандларига ҳам насиб этди”, деганида филология фанлари доктори Нурбой Жабборов минг бора ҳақ эканини ушбу асарни кўрганларнинг кўпчилиги самимий эътироф этди.

Муболағасиз айтиш керакки, таниқли режиссёр, қатор фильмлари билан шуҳрат қозонган Жаҳонгир Қосимов, сценарий муаллифлари Нурилло Аббосхон

ва Абдуқайюм Йўлдошев, постановкачи оператор Рустам Муродов, постановкачи расом Дониёр Абдурахмонов, композитор Дмитрий Янов-Яновский, иқтидорли актёрлар Фарҳод Маҳмудов, Саидкомил Умаров, Карим Мирҳодиев, Акбархўжа Расулов, Шаҳзода Матчонова, Зулхумор Мўминова, раҳматли Файбулла Ҳожиев ва Абдурайим Абдуваҳобов ҳамда бошқалар халқимиз маънавий хазинасини бойитишга ҳисса қўшгани савобли иш бўлди.

Жавҳарбек ҚОДИРОВ,
Ўзбекистон давлат санъат ва маданият институти талабаси

“Ўзбекино” Миллий агентлиги буюртмасига биноан “Ҳужжатли ва хроникал фильмлар” ДУК томонидан суратга олинган “Сузук ота” ва “Шашмақом” ҳужжатли фильмлари Туркияда ўтказиладиган V Ҳужжатли фильмлар фестивалида иштирок этади.

“Сузук ота” ҳужжатли фильми (режиссёр Муроджон Одилов, сценарий муаллифи Аъзам Исҳоқов) буюк аждодимиз ҳазрати Сузук отанинг ҳаёти ва муқаддас ислом дини тараққиётига қўшган беқиёс

Ҳужжатли фильмларимиз халқаро фестивалда намойиш этилади

хизмати ҳақида ҳикоя қилади.

“Шашмақом” фильмида (режиссёр Дониёр Шокиров, сценарий муаллифлари Оқилхон Иброҳимов, Феруза Тўрахўжаева) эса бузрук, рост, наво, дугоҳ, сеғоҳ ва ироқ мақомларидан ташкил топган жами 250 дан ортиқ ҳар хил шаклдаги куй ва ашула намуналаридан иборат маданий ёдгорлигимиз ҳақида ҳикоя қилинади.

Туркий дунё журналистлари федерацияси раҳбарлиги остида давлат ташкилотлари, университетлар ва профессионал ташкилотларнинг шериклиги ва кўмаги билан ташкил этилган V Ҳужжатли фильмлар фестивали йил якунигача ўтказилиши режалаштирилган. Ушбу фестиваль учун ўндан ортиқ давлатлардан ҳайъат аъзолари танлаб олинган. Ўзбекистондан кинорежиссёр, “Ўзбекино” Миллий агентлиги Жамоатчилик ва Бадий кенгашлари аъзоси Рашид Маликов ҳам ҳакамлар ҳайъати аъзоси сифатида рўйхатга киритилган.

“Ўзбекино” Миллий агентлиги
ахборот хизмати

Миллат муаллими



Мунавварқори Абдурашидхонов (1878–1931) – миллат муаллими. Ўта мураккаб даврда яшаб, элу юрт учун катта ишларга бел боғлаган, маслак йўлига молию жонини тиккан. Аммо қанча саъй кўргузмасин, эртақдаги кенжа ботир тақдири унинг пешона-сига ёзилмаган экан. Ёвуз аждарҳони мавҳ этиш эмас, ифлос панжалари орасида ҳалок бўлиш қисмат битигида бор экан.

1920-йилларнинг охирида сафдошлари бирин-кетин ҳибсга олина бошлагач, Мунавварқори пайтини топиб, уларга: “Қандай айбни қўймасинлар, бўйнингизга олинг. Акс ҳолда, озодликда юрган ёр-дўстларимизнинг номларини айтиб, уларнинг қамалишига сабабчи бўламиз. Биз ўзимизнинг ҳаётимизни қурбон қилиш эвазига миллатни сақлаб қолишимиз лозим”, дейди. Мағлуб йўлбошчининг сўнгги стратегияси иш бердимиз?..

Қизил империя қатағонларининг дастлабки тўлқини Мунавварқорини биринчилардан бўлиб олиб кетди – 1931 йили Москвада отилди. Совет иттифоқи путурга кетган пайтга келибгина оқланди (1989 йил, январь). Ўтган ҳафтада Президент Шавкат Мирзиёев фармонида кўра Ўқитувчи ва мураббийлар куни муносабати билан Туркистон жаҳидларининг пешволари Маҳмудхўжа Беҳбудий, Абдулла Авлоний қаторида Мунавварқори Абдурашидхоновнинг ҳам “Буюк хизматлари учун” ордени билан тақдирлангани тарихий адолатнинг тикланиши бўлди.

Бутун дунёдаги хурриятчилар орасида бир сўз бор: “Хуррият берилмас, олинур. Ҳеч нарса ила олуб бўлмас, фақат қон ва қурбон илагина олуб бўлур”. Мана бу жумлалар ҳақиқатга шул қадар мувофиқдурки, ҳазрати Одамдан шул вақтгача ҳеч бир давлат ва мамлакатда хурриятнинг берилгани, қон ва қурбонсиз берилгани тарихларда кўрилмайду. Балки, ҳар замон ва ерда хуррият берилмаган,

олинган ҳам кўп қон ва қурбонлар баробаринагина олинган.

...зиёли бўлмак учун ҳамиятсиз, раҳимсиз ўлмак лозимдирми?.. Агарда зиёли бўлмак учун шу шарт лозим эса, балки, сизни зиёли ўлмоқингиз лозимдир. Бизнинг занмизга зиёли ўлмак гоят мушкул бир нарсадир. Зиёли Миллат, Ватан нима эдигини билур ва зиёли миллат учун жонини, молини фидо этар ва миллатнинг тараққийси учун доимо ҳаракат этар. Вақти келганда, миллат учун ўзини ҳалокат вартасина ташламакга муҳайё бўлур. Сизнинг билмағингиз лозимдирки, бизнинг миллатимизга садо ва сўз бирлан зиёли номини олгон инсонлар лозим эмас. Балки, хизмати, ҳаракати, ёрдами ва ҳиммати бирлан зиёли номини олгон инсонлар лозимдир. Йўқ эса, “Миллат”, “Ватан”, “Маданият” – шунга ўхшаш сўзларни билмак билан инсон зиёли бўлмайди.

...дунёга нима учун келгонини билмай, илм ва маорифга асло рағбат қилмай, жонидин ширин болаларини кўча-бақўча кездириб, бечора маъсумнинг азиз умрини жаҳолат оташина ёндиргувчи беҳамият ва бедиянат оталар ҳам орамизда оз эмасдур. Кўп диндошларимизни кўрармизки, ўз фарзандларини асло

мактабга бермай орқаларидин эргаштириб, руслар эшигида ўзлари каби хизматчиликка ўргатиб, дунё ва охирагининг саодати ўлгон илм ва маорифдин маҳрум қўймоқдин ҳеч бир ибто қилмаслар. Баъзи азизларимиз бордурки, ўғлини кўлидин тутиб мактабга олиб борур. Муаллимдан толиб қилурға: “Тақсир, шу ўғлимни гўшти сизники, устихони бизники, бир илож қилиб, тезлик ила нақд ва насия ёзмоқни ўргатиб берурсиз”, дер.

Эй қардошлар, вой миллатдошлар!!! Кўзимиз гафлат уйқусидин очиб, атрофимизга назар солмақимиз лозимдир. Ҳар миллат ўз саодат ҳол ва истиқболини муҳофазатига биринчи восита илм ўлмакига қаноат ҳосил қилиб, илм ва маорифга ортик даражада кўшиш қилган бу замонда бизлар бу гафлат ва жаҳолатимизда давом этсак, истиқболимиз ниҳоятда хавфлик ўлуб, ҳамма оламга масхара ва кулгу ўлмоғимизда ҳеч шубҳа йўқдир. Балки, бу жаҳолат зулматида саодати ухравиядин ҳам маҳрум қолмоқ хавфлидир. Бу жаҳолат натижасидурки, ўзимиз ерлик мусулмонлардан ўлдигимиз ҳолда мусофир рус ва яҳудийлар эшигида мардикор ва хизматчи ўлдук. Бу жаҳолат хоҳишидурки, миллат фойдаси учун жонин қурбон қилмоққа лойиқ арслон каби

йигитларимиз бугун миллатни ёдларидин чиқориб, истеъдод ва гайратларини чойхона ва пивахоналарга сарф этмақдурлар.

Оврупо ваҳший экан, биз маданий эдик, Оврупо попослари “Осиё осмонига жисман учдимми, руҳан учдимми?” каби диний низолар билан бир-бирларини бўғушар эканлар, усмонли

...агарда биз Тошкентдан қанча четга чиқа берсак, маориф ва маданият ишларимиз шунча заифлана ва халқнинг маорифга ва маориф ходимларига назари шунча ёмонлана борадир...

...Бизим Туркистон мамлақати туфроғ, сув ва ҳаво жиҳатидин энг бой мамлакатлардин бўла туруб, на учун ўзумиз бундан фойдалана олмаймиз?

Мана, кетба-кет етган бундай саволларга жавоб бермак учун нодонлиқ ва оламдин хабарсизлик, демақдин бошқа чора йўқдур. Бу нодонлиқ ва дунёдин хабарсизлик балосидан қутулмак учун энг аввал орамизда ҳукм сурган бузуқ одатларнинг бузуқлигини билмак ва ўрганмак керақдур... Сониян, онларни тарк қилмак керақдур...

Энди ўз ҳолимиз ва ўз тарихимизга боқсак, бир вақтлар

турклари Истанбулни фатҳ этмоқ, Туркистон турклари мадраса ва расадхоналар бино қилмоқ каби маданий ишлар билан машғул эдилар.

Сўнгралари Оврупо халқи маориф ва маданият йўлида ишлади, бу ҳолга етишди; биз тушдик, ухладик, бу ҳолга етушдук. Бугунгача Оврупо халқи осмонга учар экан, бизда соч ва соқол низолари, овруполилар денгиз остида сузар экан, бизда узун ва қисқа кийим жанжаллари, Оврупо шаҳарлари бутун электрик билан иситилур ва ёритилур экан, бизда мактабларда жўғрофия ва табиёт ўқитиш, ўқитмаслик ихтилофлари...

Фаррух ЖАББОРОВ
тайёрлади.

...миллат фойдаси учун жонин қурбон қилмоққа лойиқ арслон каби йигитларимиз бугун миллатни ёдларидин чиқориб, истеъдод ва гайратларини чойхона ва пивахоналарга сарф этмақдурлар...

– Зарифа қизим доим калишимни артиб кўярди, – деди чол ҳассасини олиб, эшикдан чиқар экан. – Майли, мен тўрт қадам юриб келай, Қумри. Эшикни ёпиб оларсан.

Зарифа

– Хўп, – дейди набира кўлидаги телефондан кўзини узмай.

Саксонга яқинлашиб қолган чол бетон зиналардан қадамларини авайлаб босиб тушаётганида ортидан темир эшик тарақлаб ёпилгани ва зулфи шарақлаб сурилгани эшитилади. Шу пайтгача эшигининг темирлигини ҳам, зулфинининг шарақлашини ҳам сезмаганини эслайди. Балки эътибор қилмагандир.

Энди буви билан набира хонтахта тагига яширилган пистани ўртага олиб, “Кола”дан хўплаб-хўплаб, бемалол ўтириб сериал томоша қилади. Чолнинг икки чақиримлик ўз йўлаги бор: кечки овқатдан сўнг ёлғиз сайрга чиқади. Ўтган-кетгандан хаёл суриб, баъзан ўзича гапириниб, “оҳ” уриб, “уф” тортиб, ўша ўйдим-чуқур йўлакдан ирғай ҳассасини энгилгина тўққилатганча ширт-ширт юради ва тобора қуввати кетиб, томирлари бўртиб бораётган оёқларининг чигилини ёзган бўлади. Бу маҳалда кўп қаватли узун “дом”нинг олди, йўлақлар, серқатнов кўча, бутун дунё хувиллаб қолгандай туюлади. Ҳамма ўзини телевизорга уради, чамаси. Ҳаво очик кунлари у дарахтлар тагидаги харракка ўтириб, озгина тин олгиси келади. Яна ўзини тияди. Ўтириши учун олдин харракни ҳар хил бутилка, писта пўчоғи, сигарета қолдиқлари, чала-чўлпа ейилган овқат, конфет қоғозлари, сақичдан тозалаш, кейин дастрўмоли билан артиши керак. Артмаса бўлмайдди. Ўриндиқларнинг суянчиғи ҳам йўқ.

Оламга оройиш ингандай бўлиб, кўчалар, йўлақлар, унинг атрофи тагин гавжумлаша бошлагач, ортига қайтади ва инқиллаб-синқиллаб иккинчи қаватга кўтарилади. Кўнғироқ тугмачасини босади.

– Яхши айланиб келдингизми? – дейди анча маҳалдан кейин эшикни очган невар.

– Шукр! – дейди чол ва калишини ечиб, хонаси томонга юрар экан, яна минғирлайди. – Зарифа қизим доим калишимни артиб кўярди...

Ортидан темир эшик яна тарақлаб ёпилади.

Келини Кўкон шаҳар прокуратурасига ишга тайинлангач, оиласини – эри билан қизи Зарифани кўчириб кетди. Ёлғизланиб қолган чол-кампири энди

қизининг қизи – Қумри билан андармон.

– Мен тўрт қадам юриб келай, Қумри, – дейди эртаси куни чол яна ҳассасини кўлига олар экан.

– Хўп, – дейди набира теле-

– Хўп.

Ёмғирли кунлар бошланади.

– Қоронғида оёғимни ҳалқопга босиб олдим, калишим лой бўлди-да, савил, – дейди чол бир оқшом. – Зарифа қизим бўлганида, ювиб, тозалаб кўярди...

– Телефон қилсам, телефони ўчган, – дейди айбдор оҳангда Қумри. – Қишлоқ жойларда чироқ тез-тез ўчиб туради, дейишади. Батарейкаси ўлиб қолган бўлса керак.



фонидан кўзини узмай. – Яхши бориб келинг, бува.

– Зарифа қизим доим калишимни артиб кўярди, – деб гингшийдди чол яна.

Ортидан темир эшик яна тарақлаб ёпилгани ва зулфи яна шарақлаб сурилгани эшитилади.

– Қумри, – дейди чол кўчадан қайтиб келгач, – Зарифа қизимга телефон қилсанг-чи, бирров келиб, калишимни артиб кетсин.

– Хўп, – дейди набира. – Ҳозир қиламан.

Бир куни остонада чол пала-партиш ечилган пойабзалга қоқилиб кетади.

– Зарифа қизим патинкаларни доим четга чиройли қилиб териб кўярди, – дейди чол бошини чайқаб. – Зарифа қизимга телефон қилмадингми, Қумри?

– Қилдим, – дейди набира. – Қайта-қайта қиляпман. Телефони ўчган.

– Ҳа-а, – деб минғирлайди чол. – Сен яна телефон қилавер, Қумри. Калишим роса чанг бўп кетди-да, савил. Зарифа қизим келиб, бир артиб кўйса эди...

– Бу гапинг ҳам тўғри, Қумри, – бошини чайқайди чол. – Одамнинг батареикаси ўлиб қолса, қийин-да.

– Йўқ, – деб гапга аралашади кампири. – Мактабда ўқиш бошланиши билан доно келинингиз Зарифанинг телефони кўлидан опқўяди.

– Э-э, шунақами? – деб ўсмоқчилайди чол. – Билмас эканман. Ўн беш-ўн олтига кириб қолган-ку, Зарифа қизим хафа бўлмасмикан?

– Ҳа-да, Зарифангиз ҳам мана шу Қумри тенги.

– Майли, кўявер, онаси. Ўзинг телефон қилақол. Зарифа қизим бирров келиб, калишимни артиб кетсин. Яғири чиқиб кетди савилнинг...

– Қилавериб чарчадим. Эрталаб яна уриниб кўраман. Шу баҳонада Кўқоннинг адрасидан икки кийимлик жўнатинглар, деб айтаман...

– Ҳа-а-а, – чол хонасига кириб, эшигини ёпар экан, юзини қайноқ томчилар юваётганини сезмайди.

– Зарифа қизим, ўзимнинг ой қизим!..

Жонқобил ЖУМА

Бўлган воқеа

БИР ТУП ТУТ

ёхуд Норча бободан энгилган “ёв”



Китоб туманидаги Қоратепа адирлари Ургут тоғларига туташиб кетган. Улкан бир туپ тутни айтмасангиз, ҳамма ёқ яйдоқ дала. Тубжой аҳоли сувсиз қирларда лалми тарвуз ва арпа-буғдой экиб, мўл ҳосил олади. Ёмғир яхши ёққан йиллари чунонам галла бўладики, асти кўяверасиз.

Ёзнинг жазирама кунлари тарвуз қоровули Норча бобо чайласида дам олиб ўтирганида мотоциклда икки киши Чинор қишлоғи томонидан туман марказига қараб тупроқ йўлни чангитиб елиб ўтиб-ди.



Орадан ҳеч қанча вақт ўтар-ўтмас, йўл четига буғдойзорга ўт кетибди.

Ҳа, ярамаслар! Папирос чекиб отворган шекилли. Ё мотоциклдан учкун чақнаб, ғаллазорга тушганмикан, дея ўйлади.

Норча бобо шошиб қолди: “01” га хабар қилай деса, телефон йўқ. Дониёршайх қишлоғи эса анча

пастда, уч-тўрт чақирим узокликда. Нима қилишни билмай қолди отахон. Олов эса забтига оляпти. Ғалла-нон, ризқ-рўз ёняпти. Вақт эса ғанимат.

Норча бобо ўзини йўқотиб қўймади. Чайладан беш-олти юз метр наридаги улкан тут томон югуриб кетди ва пичоғини қинидан суғуриб олди-ю, дарахт шохларидан беш-ўнтасини кесиб, аланга ичида қолган буғдойзорга етиб борди. Қўлидаги шохшабба билан ўтни ўчира кетди. Икки соат тилсиз ёв билан курашди. Димоқларини тутун ачитса-да, оловнинг

сўнги учқунига даф этди-ю, хушидан кетди...

Соч-соқоли, қоши куйиб кетган Норча бобо кўзини очиб қараса, тепасида оқ халатли кишилар туришибди. Унинг биринчи айтган сўзи шу бўлди:

– Олов ўчибдимми ишқилиб?!

Азамат СУЮНОВ

Болажонлар қувонса бўлди

Юртимизда бунёдкорлик кўлами йил сайин кенгаймоқда. Хусусан, Мактабгача таълим вазирлиги ҳузуридаги Инфратузилмани ривожлантириш бўйича инжиниринг компаниясининг Сурхондарё вилоят филиали буюртмасига кўра, инвестиция дастури асосида жойларда қатор муассасалар бунёд этилмоқда. Масалан, Қизириқ тумани Янгитурмуш маҳалласидаги 4-МТТ биноси анча таъмирталаб ва сифими кам эди. Мазкур таълим-тарбия маскани ўрнида 150 ўринли бино қад кўтарди. 3 миллиард 500 миллион сўмлик ушбу инвестиция лойиҳасини амалга оширишда “Қизириқ бинокори” МЧЖ қурувчилари жонбозлик кўрсатишди.



Шеробод туманидаги 5-мактабгача таълим ташкилоти ҳам обдон реконструкция қилинмоқда. Насиб этса, бу болажонлар учун зўр туҳфа бўлишига ишонамиз. Мазкур 180 ўринли муассасани барпо этишда “Кафолат Термиз” МЧЖ жамоаси фаоллик кўрсатиб ишлаётир.

Тумандаги Гамбур маҳалласи болажонлари учун эса 90 ўринли 10-МТТ бунёд этилди. Ҳозир “Файз истиқлол бунёдкори” хусусий корхонаси бинокорлари маскани фойдаланишга топшириш учун сўнгги пардозлаш ишларини бажаришяпти.

Вилоят ҳокимлиги ҳузуридаги “Ягона буюртмачи хизмати” инжиниринг компаниясининг



буюртмасига кўра, ижтимоий соҳа объектлари ҳам захматкаш бунёдкорлар томонидан бирин-кетин қуриб топширил-

моқда. Мисол учун, Қизириқ туманида замонавий кўринишдаги 315 ўринли 9-ихтисослашган мактаб биноси қисқа фурсатда

барпо этилди. Энди ўқувчилар ўқув йилини янги даргоҳда давом эттиришади.

Ангор туманида кўзи ожиз ва заиф кўрувчи болалар мактаб интернати 180 ўринга мўлжаллаб бунёд этилмоқда. 10,5 миллиард сўмлик лойиҳа асосида барпо этилаётган бу бино қурилишини амалга оширишни моҳир қурувчи **Рўзибой Чориев бошчилигидаги “Хусниддин-Чори” хусусий корхонаси** ўз зиммасига олган. Бу ерда ўқувчилар учун 150 ўринли ётоқхона, ошхона ва тиббий муолажа хонаси ҳамда бошқа хўжалик хоналари бунёд этилган. Айти дамда масканида қурилиш-таъмирлаш якунланиб, пардозлаш ишлари бажарил-япти.



Хатирчида мактаб, Карманада эса боғча

Суратда (ўнгдан чапга): “Navoiy muxandisi” хусусий корхонаси раҳбари Собир Тўраев, уста Илҳом Камолов ва иш юритувчи Ваҳобиддин Толибов.

Навоий вилоятида ҳам Инвестиция дастури асосида таълим-тарбия объектлари барпо этилмоқда. Хатирчи туманининг Пахтакор маҳалласидаги 38-мактаб 20 йил олдин бунёд этилган бўлиб, муассаса биноси таъмирталаб ҳолатга келиб қолган эди.

Инвестиция лойиҳасига кўра, мазкур маскан 4 миллиард 200 миллион сўм эвазига реконструкция қилинмоқда. Бу ерда “Хатирчи дизайн” МЧЖ қурувчилари қурилиш-таъмирлаш ишларини якунлаб, бинони

қисқа фурсатда ўқувчилар ихтиёрига топширишга ваъда беришган.

Найман маҳалласи ҳудудидаги 840 ўринли 6-мактаб ҳам таъмирга муҳтож бўлиб қолган эди. Том ва пол қисми, иситиш тизими ҳамда ўқув хона-

лари лойиҳа доирасида мукамал таъмирланмоқда. Ушбу лойиҳани амалга оширишни “Боғишамол фаровонлиги” МЧЖ моҳир бинокорлари зиммаларига олишган.

Мактабгача таълим вазирлиги ҳузуридаги Инфратузилмани ривожлантириш бўйича инжиниринг компаниясининг Навоий вилоят филиали буюртмаси асосида 14 та таълим-тарбия муассасаси реконструкция

қилиняпти, янгидан қуриляпти. Кармана тумани Айрончи маҳалласи аҳли болажонлари энди замонавий кўринишдаги 150 ўринли 9-мактабгача таълим ташкилотига қатнайди. Бу ерда болажонлар мароқ билан ўйнаб, таълим-тарбия олишлари учун қўшимча гуруҳ блогли, ошхона, ўйин майдончалари, ёзги сузиш ҳавзаси барпо қилинмоқда. Мазкур маскани сифатли

бунёд этишда **Собир Тўраев раҳбарлигидаги “Navoiy muxandisi” хусусий корхонаси** бинокорлари сидқидилдан меҳнат қилишмоқда.

Тумандаги 150 ўринли 1-МТТ ҳам инвестиция лойиҳасига кўра янгидан барпо этилмоқда. Айти дамда бинонинг томи ёпилиб, пардозлаш қизгин давом этмоқда.

Юнусали ОЧИЛДИЕВ,
“XXI asr” мухбири

Бахтсиз ҳодиса содир бўлиб қолса... СУҒУРТА асқотади



Ҳеч бир инсон кўнгилсиз воқеалардан, бахтсиз ҳодисалардан, нохуш ҳолатларга тушиб қолишдан ҳимояланмаган. Кутилмаганда бошимизга қандай савдолар тушишини олдиндан билмаймиз.

Сир эмас, кутилмаган бахтсизлик кўп ташвишлар келтиради, айниқса, ўлим билан яқунланса. Бунда баъзи оилалар нафақат яқин инсонидан, балки ягона боқувчидан, таъминотчидан айрилиши мумкин.

Шундай ҳолларда жабрланувчининг қарамоғида бўлиб келган нафақадаги ота-онаси, турмуш ўртоғи, вояга етмаган фарзандларини моддий қўллаб-қувватлаш мақсадида суғурта ёрдамга келади.

Айтиш жоизки, 2009 йил 16 апрелдаги “Иш берувчининг фуқаролик жавобгарлигини мажбурий суғурта қилиш тўғрисида”ги қонунга кўра ходим меҳнат вазифаларини бажариши билан боғлиқ ҳолда меҳнатда майиб бўлиши, касб касаллигига чалиниши ёки бошқача тарзда шикастланиши муносабати билан унинг ҳаёти ёки соғлиғига етказилган зарарнинг ўрнини қоплаш бўйича иш берувчи ўз фуқаролик жавобгарлигини белгиланган шартлар асосида ва тартибда суғурталаши шарт. Бахтсиз ҳодиса, яъни суғурта ҳодисаси юзага келганида суғурта компанияси жабр кўрган

ходимга ёки унинг оила аъзоларига суғурта қопламасини тўлаб беради.

– Компаниямизга иш берувчининг фуқаролик жавобгарлигини мажбурий суғурталаш тури бўйича доимий мурожаатлар келиб тушади, – дейди “Kafolat sug'urta kompaniyasi” АЖ суғурта даъволарини кўриб чиқиш департаменти раҳбари Наргиза Мамажанова. – Бундай ҳолларда ходимларимиз даъволарни тезкорлик билан кўриб чиқади ва суғурта қопла-

да бўлган ота-онаси, аёли ва ҳали бир ёшга ҳам тўлмаган қизи оила боқувчисидан айрилган. “Kafolat sug'urta kompaniyasi” АЖ дарҳол марҳумнинг оила аъзоларига 643 миллион 529 минг 644 сўм миқдоридан суғурта қопламасини тўлаб берди.

Фарғона вилоятининг Данғара туманидаги мактабларда иш фаолиятини олиб борган икки нафар ходим ҳам иш пайтида ана шундай бахтсиз ҳодиса туфайли дунёдан бевақт кўз

қилинган, Наманган вилоятининг Учқўрғон туманидаги давлат муассасаларининг бирида хизмат қиладиган фуқаро ҳам иш вақтида содир бўлган бахтсиз ҳодиса туфайли тан жароҳати олган. Оқибатда у бир умрга 40 фоиз меҳнат қобилиятини йўқотган ва III гуруҳ ногирони бўлиб қолган. Жабр кўрган фуқарога ҳам 349 миллион 69 минг 230 сўм тўланди.

Яна бир мисол, Самарқанд вилоятида фаолият кўрсатувчи масъулияти чекланган жамиятларнинг бирида ходим айнан иш вақтида, меҳнат вазифасини бажарётган пайтда нохуш ҳодиса туфайли жароҳат олади. Қарабсизки, 80 фоиз меҳнат қобилиятини йўқотади ва II гуруҳ ногирони бўлиб қолади. Айни ҳодиса ҳам атрофлича кўриб чиқилди ва унга 569 миллион 641 минг сўм миқдоридан суғурта қопламаси тўланди...

Авалло, ҳеч ким, хоҳ у иш жойида бўлсин, хоҳ кўча ёки уйида бўлсин, бу каби нохуш ҳолатларга ҳеч қачон дуч келмасин, саломатлигидан айрилиб, кўмакка муҳтож бўлмасин. Ёки умри хазон бўлиб, яқинларини жудолик гамига қолдирмасин.

Аммо... бунини ҳаёт дейдилар. Сўзимиз бошида айтганимиздек, эртага бизни қандай қисмат кутаётганини фақат Яратган билади. Ўзи асрасин. Унутмайлик, бундай кўнгилсиз воқеалар содир бўлганида суғурта сиз ва яқинларингизга ёрдам беради.

Меҳрибону РАЙИМЖОНОВА,
“Kafolat sug'urta kompaniyasi” АЖ
матбуот хизмати ходими

Хизматлар лицензияланган.



малари ўз вақтида тўлаб берилиши таъминланмоқда.

Жамиятимизнинг Бухоро вилояти филиали томонидан юқоридаги суғурта тури бўйича суғурта қилинган корхона ҳайдовчиси иш вақтида йўл транспорт ҳодисаси туфайли ҳаётдан кўз юмган. Натижада, эндигина 31 ёшни қаршилаган йигитнинг қарамоғи-

юмган. Улардан бирининг қарамоғидаги ногирон отаси ҳамда балоғат ёшига етмаган икки нафар дилбандига 413 миллион 643 минг 567 сўм, иккинчи ходимнинг онаси, аёли ҳамда вояга етмаган икки нафар зурриёди учун 509 миллион 442 минг 762 сўм суғурта қопламаси тўлаб берилди.

Компаниямиз томонидан суғурта

Ажабо!

ОЧИҚ ТАНЛОВ ЁПИҚ БЎЛАДИМИ?

Ўтган ҳафтада бир гапни эшитиб, хурсанд бўлдим. Фулом деган танишимнинг ўғли ўтган йили эди, шекилли, санъат коллежини битирди. Йигитча Россияга ишлагани кетмоқчи бўлибди. Ота ўғлини зўрға шаштидан қайтариб, тузукроқ ишга жойлашга ваъда берибди.

Яна қаерга денг, Олмалик тоғ-металлургия комбинатига! “Унда неча юзлаб одам ишлай-

ди. Ўғлимизга ҳам бирор иш топилиб қолар”, деган умид, ўйлар билан ҳаракатга тушди. Бу ёғи ўзбекчилик дегандек, ишни таниш излашдан бошлади. Менга дардини айтиб қолди. Ўзи, икки ўғли ва бир қизи ҳам ОКМКда ишлайдиган ошнамни кига бирга бордик. Маслаҳатлашув асносида маълум бўлдики, бу борада таниш-билишчилик, олди-берди деганлар эскича таомил аллақачон унутилган.

Аваллари фақат Олмалик шаҳрида пропискаси борлар комбинатга ишга олинган экан, бу тартиб ҳам бекор бўлибди. Ҳозирда ОКМК бўш иш ўринларига очик танлов асосида ишга қабул қилаётган экан!

Хуллас, дўстимнинг жияни ҳам шу йил бошида синов, суҳбатлардан ўтиб, ишга жойлашибди. Танлов ўтказиладиган манзилни билгач, енгил тортдик. Лекин Фулом эртасигаёқ ўша

жойга бориб, тарвузи қўлтигидан тушиб қайтди. Сабаби, одам кўп йиғилаётгани, яъни карантин қоидалари бузилаётгани боис танловлар тўхтатилганига анча бўлган экан.

Ўзимизча мушоҳада қилдик: комбинат жуда катта бўлса, деярли ҳар куни кимдир турли сабаблар билан ишдан бўшайди, уларнинг ўрни тўлдирилиши керак эмасми? Хўш, пандемия баҳонасида

бир неча ойдан буён танлов ўтказилмаётган бўлса, бўш қолган ўринлар масаласи қандай ҳал этиларкан? Бошқа бир оғайнимиз эса “Очиқ танлов эмиш тагин, мактабда ўқиётганимда шу гапни айтсаларинг ишонардим”, деди устимиздан кулгандек. Тушунмадик. Балки биз билмаган бошқа сир бормикан?

Бобо ДЎСТ

О‘zLiDeP Сиёсий Кенгаши Ижроия қўмитаси партиянинг Мирзо Улуғбек туман Кенгаши аппарат раҳбари
Дилрабо Ачилованинг
вафоти муносабати билан марҳумнинг оила аъзоларига чуқур ҳамдардлик билдиради.

<p>TAХРИР ХАЙЪАТИ: Ақтам ХАЙТОВ Дилшод ШОУМАРОВ Шухрат БАҒОЕВ Мавлуда ХЎЖАЕВА</p>	<p>MUASSIS: TADBIRKORLAR VA ISHBILARMONLAR HARAKATI – O‘ZBEKISTON LIBERAL-DEMOKRATIK PARTIYASI</p> <p>XXI ASR IJTIMOIY-SIYOSIY GAZETA HAFTALIK NASHR</p> <p>Бош муҳаррир Норқобил ЖАЛИЛОВ</p> <p>Сирожиддин САЙИДИ Адхам ШОДМОНОВ Виктор ПАК Насимжон АЛИМОВ</p>	<p>Фаррух ЖАББОРОВ Бош муҳаррир Ўринбосари</p>	<p>Таҳририят манзили: Тошкент шаҳри Нукус кўчаси 73^а-уй.</p> <p>электрон почта: xxi_asr@mail.uz xxi_asr@mail.ru</p> <p>Телефонлар: қабулхона – 71 215-63-80 (тел./факс). Обуна ва реклама бўлими – 71 255-68-50.</p>	<p>“XXI asr” ижтимоий-сиёсий газетаси Ўзбекистон Матбуот ва ахборот агентлигида 2011 йил 14 июнда 0009-рақами билан рўйхатдан ўтказилган.</p> <p>“Шарқ” нашриёт-матбаа акциядорлик компанияси босмахонасида чоп этилди.</p> <p>Корхона манзили: Тошкент шаҳри Буюк Турон кўчаси 41-уй. Газета офсет усулида, А-3 форматида босилди. Ҳажми – 3 босма табоқ. Буюртма рақами: Г – 1058 Тираж: 2498 Баҳоси келишилган нарҳда.</p> <p>ЎЗА яқуни – 22:20 Топширилди – 23:20</p>	<p>Таҳририятга келган қўлёзмалар тақриз қилинмайди ва муаллифларга қайтарилмайди.</p> <p>© “XXI asr” дан олинган маълумотларга манба сифатида газета номи кўрсатилиши шарт.</p> <p>Муаллифлар фикри таҳририят нуктаи назаридан фарқ қилиши мумкин.</p> <p>Газета таҳририят компьютер марказида терилди ҳамда дизайнер</p> <p>Маъруфжон Раҳмонов томонидан саҳифаланди.</p>	<p>ISSN 2181-497X</p> <p>НАШР КЎРСАТКИЧИ: 406 1 2 3 4 5 6</p> <p>Навбатчи муҳаррирлар: Фаррух ЖАББОРОВ, Беҳзод ИСРОИЛОВ.</p>
--	--	---	--	--	---	--